

ՄԱՀԿԱՆԱԲԵՐԴՑԻՆԵՐԻ (ՄԱԴՈՒՆԵԱՆՆԵՐԻ) ԻՇԽԱՆԱԿԱՆ ՏՈՒՆԸ ԺԲ.—ԺԳ. ԴԱՐԵՐՈՒՄ

ՀԱՅՐԱՊԵՏ Գ. ՄԱՐԳԱՐԵԱՆ

ՆԵՐԱԾՈՒԹԻՒՆ

Մահկանաբերողիների տոհմը պատուաւոր տեղերից մէկն է գրադեցնում ԺԲ.—ԺԳ. դարերի Հայաստանի աւատատիրական աւազանին ներկայացնող ընտանիքների շարքում: Այս իշխանական տան առաւել հզօրութեան փուլերում նրա անդամների ազդեցութեան սահմանները դուրս էին գալիս Հայաստանի շրջանակներից, իսկ ԺԳ. դարի 70—80ական թուականներին Մահկանաբերողիները ակնառու դեր էին կատարում նաեւ Արեւելեան Վրաստանի ճակատագրում: Տոհմի պատմութիւնը, Հայաստանի եւ Վրաստանի ԺԲ.—ԺԳ. դարերի քաղաքական առանցքային անցուղարձերի անքակտելի մասը կազմելով, առաջին հերթին ուշադրաւ է առանձին իշխանական տների բարձրացման ու անկման պատճառների եւ ուղիների պարզաբանման, թագաւորական իշխանութեան եւ խոշոր աւատատէրերի փոխյարաբերութիւնների տրամաբանութեան բացայայտման տեսանկիւնից: Առանձնայատուկ հետաքրքրութիւն է ներկայացնում նաեւ Մահկանաբերողիների ինքնատիպ էթնոմշակութային դիմապատկերի հետազօտութիւնը: Դժուար է մատնացուցել դարաշրջանի մէկ այլ հայկական տոհմ, որը այդչափ աչքի ընկնի տարբեր էթնիկական, դաւանական ու մշակութային աշխարհների հետ սերտ շփումներով ու կապերով: Այս ամէնն էլ խիստ ցանկալի է դարձնում Մահկանաբերողիների իշխանական տան պատմութեան համակողմանի ուսումնասիրութիւնը:

Թերեւս Մահկանաբերողիների պատմութեան կարեւոր առանձնայատկութիւնն է՝ յաճախ Հայաստանից դուրս գործելու հանգամանքը, որ պայմանաւորել է հայազէտների համեմատաբար համեստ հետաքրքրութիւնը տոհմի գործունէութեան նկատմամբ: Հայագիտութեան մէջ միայն Սուրէն Երէմեանն է առանձին աշխատութեամբ անդրադարձել Մահկանաբերողիների պատմութեանը: սակայն ուռսերէն գրուած այդ հետազօտութիւնը մնացել է անտիպ, թէեւ նրանից յաճախ

են օգտուել ուսումնասիրողները՝ Վրացագէտները, իրենց հերթին, գրադ-
ւել են գլխաւորապէս ԺԳ. դարի երկրորդ կէսի Մահկանաբերոցիների
գործունէութեան հետազօտութեամբ: Տոհմի պատմութեան ԺԲ. դարի
ժամանակահատուածը սակաւ չափով է ուսումնասիրուել վրացագիտու-
թեան մէջ, քանի որ առաջին Մահկանաբերոցիների պատմութիւնն ար-
տացող հայկական աղբիւրները համեմատաբար ուշ են գրուել վրա-
ցագէտների ուշադրութիւնը: Մահկանաբերոցիների պատմութիւնը վեր-
ջին տարիներս գրողները է արտերկրի կովկասագէտներին, սակայն
Կիրիլ Թումանովի² եւ Բ. Լիմպէրի³ աշխատութիւններում միայն ընտա-
նիքի տոհմածառը վերականգնելու փորձեր են ձեռնարկուած: Իշխանա-
կան տան ուղին եւ ճակատագիրը ներկայացնելու եւ վերլուծելու խնդիր՝
այդ հետազօտողներն իրենց առջեւ չեն դրել:

Ելնելով ԺԲ.–ԺԴ. դարերի հայ աւատատիրական աւագանու քա-
ղաքական, սոցիալական եւ էթնոմշակութային պատմութեան ուսում-
նասիրման առանցքային խնդիրներէն՝ ստորեւ հարկ եմ համարում անդ-
րադառնալ մի շարք հարցերի, որոնց լուսաբանութիւնը հնարաւորու-
թիւն կարող է ընձեռել բազմակողմանի եւ ընդգրկուն պատկերացում
կազմել տոհմի պատմութեան մասին:

Ա. ՏՈՀՄԻ ԱՆՈՒԱՆՈՒՄԸ ԵՒ ԾԱԳՈՒՄԸ

Տոհմի անուանման հարցը գիտական գրականութեան մէջ դեռեւս
յատուկ քննութեան նիւթ չի դարձել: Այժմեան հայագիտական հետազօ-
տութիւններում ընտանիքն առաւել յայտնի է «Մահկանաբերոյի Արծրու-
նիներ» անուանումով: Այն շրջանառութեան մէջ է մտցրել Երէմեանը,
որին հետեւել են յաջորդ ուսումնասիրողները: Աւելի վաղ հայագէտները
տոհմի անդամներին կոչում էին Արծրունիներ, առանց որեւէ մասնաւոր-
րեցման⁴: Վրացագէտները, աւանդաբար, «Մահկանաբերոցի» են կոչում
միայն Սաղուն Բ. ին եւ Խութու Բուղային: Միայն վերջերս են նրանք
սկսել, հայագիտական գրականութեան ազդեցութեամբ, «Արծրունի»
անուանել տոհմի վաղ շրջանի ներկայացուցիչներին՝ Ամիր–Քրդին եւ
Վասակին⁵: Ամբողջ տոհմի միասնական անուանման հարցը նրանց ընդ-
հանրապէս չի գրադեցրել:

Ելնելով այն իրողութիւնից, որ տոհմի գործունէութեան դարա-
շրջանի մեծ մասում (հնարաւոր է՝ բացառութեամբ ԺԳ. դարի վերջից
սկսուած եզրափակիչ փուլի, որի մասին տեղեկութիւնները բացակայում
են) նրանց էր պատկանում Մահկանաբերոյ ամրոցը՝ շրջակայ գաւառով
հանդերձ, բաւարար հիմք գոյութիւն ունի ընտանիքը «Մահկանաբերոցի»
կոչելու համար: Ճիշդ է, այն վկայուած է վրացական աղբիւրում⁶, բայց
լիովին հնարաւոր է նրա գործածականութիւնը նաեւ հայկական միջա-

վայրում: Պէտք է հաշուի առնել, որ տոհմային կալուածքի, եւ յատկապէս բերդի, անուանումից կազմուած տոհմանունները ամենեւին էլ խորթ չեն եղել ժԲ.—ժԴ. դարերի հայ իրականութեանը: Մասնաւորապէս՝ պատմիչներից միայն Ստեփանոս Օրբելեանը վկայում է «Գագեցի», «Գեռաքարեցի», «Մածնաբերդեցի», «Առփայեցի», «Տաշրացի», «Կայենեցի», անուանումների տարածուած լինելը նշուած ժամանակաշրջանում⁵: Խօսուեն են նաեւ փաստաթղթերի, վիճադիր արձանագրութիւնների եւ ձեռագրերի յիշատակարանների հաղորդումները, որոնցում յիշատակուած են «Ալվեցի»⁶, «Շահաուեցի»⁷ տոհմանունները:

Օրբելեանը միաժամանակ հաղորդում է Մահկանաբերդեցիների տոհմի այն անուանումը, որը գործածական էր դարձել նշանաւոր Սաղուն Բ.ի գործունէութեան համընդհանուր ճանաչում ստանալու հետեւանքով՝ «գորդիան Սաղուն ասթարէկին»⁸: Տոհմի «Սաղունեաններ» անուանումը եւս նոյնքան ընդունելի կարող էր դիտուել, որքան «Մահկանաբերդեցիներ» կոչումը, բայց քանի որ առաջինը բացարձակապէս չի գործածուած գիտական գրականութեան մէջ, ապա մնում է դիմել աւելի ծանօթ երկրորդ անուանածեւին, կամ զուգահեռաբար գործածել երկուսն էլ⁹: Ինչ վերաբերում է ընտանիքի «Արծրունի» անուանմանը, ապա, ինչպէս ցոյց է տրուելու ստորեւ, այս իշխանական տան արծրունիական տոհմակուներքների վարկածը հնարաւոր չէ ապացուցուած համարել:

Միեւնոյն գերդաստանի առանձին տոհմաճիւղն էին ներկայացնում Ամիր—Քրդի եղբայր Սարգսի սերունդները՝ Խաւաասեանները, որոնք ժԳ. դարի առաջին կէսում, հեռանալով Մահկանաբերդից, կապուել էին Լոռէ քաղաքի իշխան Շահնշահ Ա. Չաքարեանի¹⁰ հետ եւ կալուածքներ էին ձեռք բերել նրան պատկանող տարածքներում: Ուստի այս երկու ընտանիքներին «Մահկանաբերդեցիներ» կամ «Սաղունեաններ» միասնական անուանման ներքոյ միաւորելը պայմանական բնոյթ է կրում:

Մահկանաբերդեցիների տոհմական ծագման հարցը քննելիս առանձնապատուկ ուշադրութեան է արժանի այդ խնդիրն արծարծող հաղորդումների ժամանակագրութեան յստակեցումը: Հայկական սկզբնաղբիւրներից Պատմութիւն վասն ազգինն ցետողաց երկի հեղինակը Սաղուն Բ.ին «Արծրունի» է կոչում ժԳ. դարի 60—70 ական թթ. դէպքերի առընչութեամբ¹¹, իսկ ժԳ. դարի մատենագիր Մխիթար Այրիվանեցին՝ այդ նշանաւոր գործչի մահուան յիշատակութեան առիթով¹²: Մինչդեռ գերդաստանի ժԲ. դարի եւ նոյնիսկ ժԳ. դարի 60ական թթ. առաջին կէսի պատմութեանը քաջատեղեակ հայ հեղինակները՝ ժԲ. դարի հեղինակ Մխիթար Գոշը, ժԳ. դարի պատմագիրներ Վարդան Արեւելցին եւ Կիրակոս Գանձակեցին լուրթեան են մատնում տոհմի առաջին ներկայացուցիչների տոհմական պատկանելիութեան հարցը: Նոյնը կարելի է ասել

վրացական աղբյուրների եւ Մահկանաբերդցիների թողած բաւականաչափ հարուստ վիճագիր եւ յիշատակարանային ժառանգութեան մասին: Ուստի Պատմութիւն վասն ազգին նետողացի եւ Այրիվանեցու հաղորդումները՝ Մահկանաբերդցիների արծրունիական ծագման վերաբերեալ, լրացուցիչ հիմնաւորման կարիք են զգում: Այլ ուղղութեամբ միակ փորձն առայժմ ձեռնարկել է Երէմեանը, որի կարծիքով Արծրունիների այդ տոհմաճիւղին Հիւսիսային Հայաստան է տեղափոխել վրաց թագաւոր Դաւիթ Շինողը՝ (1089–1125) շնորհելով Մահկանաբերդը¹⁵: Յիրաւի, մահուանից քիչ առաջ, 1124 թ., Դաւիթ Շինողը հնարաւորութիւն ստացաւ տնօրինելու Մահկանաբերդի ճակատագիրը եւ, հաւանաբար, այն յանձնել է հայ իշխանի: Սակայն Երէմեանի տեսակէտը կռահում է մնում մի կարելոր կէտում. անհասկանալի է, թէ ի՞նչ հիմք գոյութիւն ունի ամրոցն ստացած իշխաններին Արծրունի համարելու համար: Բոլոր դէպքերում, Արծրունիների հետ աւրնչակցութիւն չեն յիշատակում ո՛չ փամանակակից հեղինակները եւ ո՛չ էլ Մահկանաբերդցիների ընտանիքի անդամները: Ինչպէս ուղղակի ազգակցութիւն հաւաստող, այնպէս էլ խնամիական կապ մատնանշող փաստերի բացակայութեան պարագայում, զժուար է նոյնիսկ ենթադրել, թէ ի՞նչն է ազգակ ծառայել հենց Արծրունիների հետ տոհմակցութիւն փնտռելու համար:

Թերեւս կարելի է անել հետեւեալ կռահումը:

Յատուկ ծագումնաբանութիւն մշակելու կարիք՝ Մահկանաբերդցիները պէտք է զգային ԺԳ. դարի 60–80ական թթ., երբ հրապարակի վրայ էին Սաղուն Բ.ն եւ նրա որդի Խուլթլու Բուղան: Եւ պատահական չէ, որ այդ փամանակահատուածով են թուազուում տոհմի արծրունիական ծագման մասին հայ պատմիչների վկայութիւնները, ինչպէս նաեւ Սաղուն Բ.ի դուստր Վանենիի յիշատակութիւնը «Թագաւորազն» մակդիրով¹⁶: Եթէ հաշուի առնենք, որ հայկական ամենանշանաւոր տոհմերը՝ Արշակունիները եւ Բագրատունիները արդէն հռչակուել էին համապատասխանաբար Պահլաւունիների եւ Զաքարեանների նախահայրեր, ապա թագաւորական յաջորդ եւ առաւել հեղինակաւոր տոհմը ներկայացնում էին Արծրունիները: Մահկանաբերդցիներին եւ Արծրունիներին միմեանց կապելու համար, այնուամենայնիւ, պէտք է հիմնուել որեւէ իրական փաստի վրայ: Թւում է, Արծրունիներ—Մահկանաբերդցիներ աւրնչակցութեան հիմնաւորման համար ատաղձ է ծառայել հետեւեալ իրողութիւնը: Յայտնի է, որ Սաղուն Բ.ն, մօտաւորապէս 1260թ. միջնորդի դեր ստանձնեց մոնղոլների ու սասունցիների միջեւ եւ նշանակուեց Սասունի կառավարիչ¹⁷: Թէեւ նա երկար չի կառավարել Սասունում, այնուամենայնիւ հնարաւոր է, որ այդ միջադէպի ազդեցութեամբ նրա տոհմը կապուել է Արծրունիների հետ: Ինչպէս երեւում է, այս անգամ եւս վճռորոշ

դեր են կատարել Մովսէս Խորենացու Հայոց պատմութիւնից (Ե. դար) բխող պատկերացումները: Յայտնի է, որ Պատմահայր Ասորեստանի Սենեքերիմ արքայի որդիներից է սերուած համարում Հայկական Տաւրոսին տիրող իշխանական տների մեծ մասին, այդ թւում նաեւ Արծրունիներին¹⁸: Հետեւաբար, նաեւ մատենագրական հիմք է գոյութիւն ունեցել Սասունի նորայայտ տիրակալի տոհմակուները Հարաւային Հայաստանում փնտռելու եւ Մահկանաբերդցիներին Արծրունիներին առնչակցելու համար: Բայց եւ այնպէս, Մահկանաբերդցիների արծրունիական ծագման տեսակէտը կենսունակ չի գտնուել եւ անհետացել է տոհմի հզօրութեան վերջնական կորստի հետ միաժամանակ: Այսպիսով, Մահկանաբերդցիների տոհմակուները հարցը առայժմ բաց է մնում եւ կարող է վերջնականապէս լուսարանուել նոր սկզբնաղբիւրների ի յայտ գալու պարագայում:

Մահկանաբերդցիների ընտանիքի պատմութեանը բաւարար չափով տեղեակ չլինելու հանգամանքով պէտք է բացատրել Ի. Ջաւախիշվիլու այն կարծիքը, որի համաձայն Սաղուն Բ-ի նախնիները եղել են հայացած քրդեր¹⁹: Ինչպէս երեւում է, այդ կռահումն անելիս գիտնականն առաջին հերթին հիմնուել է «Քուրդ» անձնանունն առկայութեան վրայ տոհմում: Բայց պէտք է ենթադրել, որ Ջաւախիշվիլու տեսակէտի ձեւաւորման հարցում որոշակի դեր է խաղացել նաեւ Սաղուն Բ-ի գործունէութեան եւ անձնաւորութեան այն խիստ բացասական ընդթափրը, որով Մահկանաբերդի տիրոջը օժտել է հետագօտողը: Նրա գնահատմամբ, Սաղուն Բ-ն ներկայանում է որպէս անսկզբունքային եւ ապագայնացած անձնաւորութիւն: Սակայն կովկասագիտութեան զարգացման ներկայ փուլում ակնյայտ է, որ էթնիկական անուանումից սերող անձնանունների հիման վրայ որեւէ տոհմի ծագման մասին ենթադրութիւններ անելն առաւել քան խոցելի է: Մասնաւորապէս, «Քուրդ» անձնանունը լայնօրէն տարածուած էր հայկական իշխանական տներում ինչպէս նախորդ ժամանակաշրջանում (առաջին վկայութիւնները Ը. դարից են), այնպէս էլ յատկապէս ԺԲ.—ԺԳ. դարերում²⁰:

Յատկանշական է, որ տոհմի առաջին ներկայացուցիչները կրում էին ընդգծուած հայաշունչ անուններ (Վահրամ, Վասակ, Սարգիս, Սահակադուխտ), բայց դրանք սկսել են օտարահնչուն դառնալ արդէն ԺԲ. դարի երկրորդ կէսում եւ տիրապետող են ամբողջ ԺԳ. դարի ընթացքում: Միաժամանակ աստիճանաբար յաճախակի են դառնում այլազգիների հետ ամուսնութիւնները եւ առնչութիւնները նաեւ քաղկեդոնական հոգեւոր կենտրոնների: Որ Մահկանաբերդցիների գլխաւոր տոհմաճիւղի էթնիկական գիմանկարում ոչ—հայկական տարրերը առաջին հերթին պայմանաւորուած էին օտար միջավայրում գործելու հանգամանքով՝

երեւում է միայն Հայաստանում գործունէութիւն ծաւալած կրտսեր տոհմակիցների՝ Խաւոսեանների օրինակից: Ահա թէ ինչպէս է բնութագրում այդ տոհմաճիւղի հիմնադիր Խաւոս Ա.ի հաւատարմութիւնը նախնեաց հայկական արմատներին՝ 1232 թ. գրուած Բագնայրի աւետարանի գրիչ Իգնատիոսը. «աստուածասէր եւ բարեպաշտ, քաջահաւատ եւ գովելի ի մրցմունս արիութեան՝ հանգոյն քաջ նախնեացն իւրոց նախատակեալ ի վերայ տանս Հայոց, մեծապատիւ իշխանաց իշխանն պատրոն Խաւոս, որդի Ամիր Սարգսի» (ընդգծումը իմն է – Հ.Մ.): Խիստ ուշադրաւ է, որ Խաւոս Ա.ն արդէն երկրորդ սերնդի քաղկեդոնական, ամիրսպասալար Զաքարիա Գ. Զաքարեանի (1230–1263) դաստիարակն էր, բայց իր սանին սնուցանում էր հայրենական աւանդոյթների, այսինքն՝ հայկական ոգով. «դաստիարակելով եւ սնուցանելով ամենայն երկիրէլիւ եւ աստուածապաշտութեամբ, զոր ի նախնեացն ուսեալ էր» (ընդգծումը իմն է – Հ.Մ.)²¹: Հետաքրքրականն այն է, որ Խաւոս Ա.ն երկիցս ամուսնացել էր «պարսիկ» իշխանադուստրերի հետ, բայց վերջիններս շտապել էին քրիստոնէութիւն ընդունել²²:

Այսպիսով, փաստերը խօսում են Մահկանաբերոյցիների սկզբից եւեթ հայ լինելու եւ միայն յետագայում, այն էլ ոչ անվերադարձ, էթնոմշակութային դիմապատկերում որոշ խաթարում կրելու մասին:

Ուշադրաւ է Մահկանաբերոյցիների սոցիալական բարձր կարգավիճակ ունենալը դեռեւս ԺԲ. դարի երկրորդ քառորդում եւ, հնարաւոր նոյնիսկ, աւելի վաղ ժամանակներում: Նրանք «իշխան» են անուանւում առաջին յիշատակութիւնից²³ ի վեր եւ, անշուշտ, աւելի վաղ եւ անմիջական յարաբերութիւններ են հաստատել Տփիսի եւ վրաց արքունիքի հետ, քան Զաքարեանները:

Հետեւաբար, Մահկանաբերոյցիների (Սաղունեանների) տոհմի հայկական եւ բարձր ծագումը հաւաստի իրողութիւն է:

Բ. ՄԱՀԿԱՆԱԲԵՐՈՅԻՆԵՐԻ ԳՈՐԾՈՒՆԵՈՒԹԵԱՆ ԸՆԴՀԱՆՈՒՐ ԲՆՈՒԹԱԳԻՐԸ

Տոհմի պատմութեան մէջ ակնյայտօրէն առանձնանում են բարձրացման երկու փուլեր:

Առաջինի պայմանական սկիզբ կարելի է համարել 1124 թ., երբ վրացական բանակը հաստատուեց Անիում եւ Հիւսիսային Հայաստանի մի շարք ամրոցների թւում նաեւ Մահկանաբերոյում²⁴: Այդ կամ յաջորդ մի քանի տարիների ընթացքում էլ, պէտք է ենթադրել, սկիզբ են առել վրացական արքունիքի եւ Մահկանաբերոյցիների տոհմի առաջին (մեզ յայտնի) ներկայացուցիչ Վահրամ իշխանի փոխյարաբերութիւնները: Եթէ նկատի առնենք, որ Մահկանաբերոյը կարող էր վրաց թագաւորութեան սահման-

ների մէջ մտցուել 1124 թ. Մայիս—Օգոստոսին, իսկ Դաւիթ Շինողը մահացաւ 1125 թ. Յունուարին²⁶, ապա Մահկանաբերդի տէրերը ազդեցութիւն եւ դիրք են ձեռք բերել վրաց արքունիքում Դեմետրէ Ա.ի (1125—1155/56) օրօք: Արդէն ժԲ. դարի կէսերին նրանք հասցրել էին գրաւել Տփիսիսի քաղաքապետի պաշտօնը, այսինքն՝ նրանց բարձրացումը բաւականաչափ արագ էր տեղի ունեցել: Վրաց արքունիքում ձեռք բերած դիրքով Մահկանաբերդցիները ժԲ. դարի առաջին կէսին իրենց հաւասարը չունէին հայկական ընտանիքների շարքում եւ այդ առումով Չաքարեանների նախորդները կարող են համարուել: Ուստի Մահկանաբերդցիների եւ Չաքարեանների միջեւ խնամիական կապի հաստատումը շուրջ 1150 թուականին կամ մի փոքր աւելի վաղ՝ միանգամայն օրինաչափ իրողութիւն է ներկայանում:

Առայժմ գիտական գրականութեան մէջ առաջին փորձերն են կատարուել պարզաբանելու այն լծակները, որոնց շնորհիւ իրականացել է Մահկանաբերդցիների առաջին բարձրացումը: Մասնաւորապէս, Երէմեանը շեշտել է Ամիր—Քրդի կապերը առեւտրա—վաշխառուական շրջանների հետ²⁶: Հետազօտողներից Ի. Անթելաւան կարծիք է յայտնել, որ Մահկանաբերդցիների խոշոր աւատատիրական տոհմի ներկայացուցիչների նշանակումը Տփիսիսի քաղաքապետի պաշտօնում պայմանաւորուած է եղել թագաւորական իշխանութեան հետապնդած քաղաքական ու տնտեսական նպատակներով: Նա այն միտքն է զարգացրել, որ Մահկանաբերդցիներ Վասակի եւ Ամիր—Քրդի նշանակման հարցում կարեւոր դեր են խաղացել նրանց սերտ կապերը առեւտրատնտեսական խոշոր նշանակութիւն ունեցող Կարին քաղաքի հետ²⁷: Ի լրացումն այս կապակցութեամբ յիշատակուած փաստերի՝ արժէ նշել, որ Մահկանաբերդցիներին պատկանող տարածքներով էին անցնում Տփիսիսը Կուրի հովտի, Աղուանքի, Հայաստանի ու Իրանի հետ կապող բանուկ առեւտրական ուղիներ²⁸:

Մահկանաբերդցիների առաջին բարձրացումն ապահովող գործօնների շարքում, թւում է, որոշակի դեր են կատարել տոհմի անդամների զօրավարական կարողութիւնները: Այսպէս, ստոյգ յայտնի է, որ Վասակն ու Ամիր—Քուրդը, վարչական բարձր դիրք գրադեցնելով հանդերձ, ուղղմական աչքի ընկնող գործիչներ էին:

Այն իրողութիւնը, որ Տփիսիսի կառավարչի պաշտօնը կորցնելուց յետոյ Մահկանաբերդցիները ժԲ. դարի 90-ական թթ. հզօրութեան անկում ապրեցին, համոզիչ կերպով վկայում է, թէ համեմատաբար փոքր հողային տիրոջիւրեմէնտ ունեցող Մահկանաբերդցիների համար կառավարման համակարգում բարձր դիրք գրաւելը կենսականօրէն կարեւոր էր: Վարչական գործառոյթը բնութագրական էր մնում Մահկանաբերդցիների համար նաեւ ժԳ. դարի առաջին կէսում, սակայն այն անհամեմատ համեստ դիրք

էր ապահովում: Այսպէս, Խաւոասեանները վարում էին Շահնշահեան տան մասխուրթուխուցէսի (ծառայողապետի) պաշտօնը, իսկ ընտանիքի աւագ տոհմաճիւղի անդամները վարչական ծառայութեամբ կապուած էին Աւագեան տան հետ: Այսպիսով, Մահկանաբերդցիների առաջին բարձրացմանը (1124–1180ական թուականների վերջ) յաջորդեց վայրէջքը, որը տեւեց շուրջ եօթ տասնամեակ:

Եթէ Խաւոասեանները ԺԳ- դարի 60ական թուականներից դադարեցին որեւէ նշանակալի դեր կատարելուց, ապա հենց այդ տասնամեակում սկսուեց աւագ տոհմաճիւղի սրընթաց բարձրացումը: Եւ դարձեալ Մահկանաբերդցիների վերելքը պայմանաւորուած էր ոչ թէ նրանց քաղաքական, ռազմական կամ տնտեսական հզօրութեամբ, այլ յաջողակ վարչական ծառայութեամբ ու իլխանութեան վարչա-բիւրոկրատական վերնախաւի հետ կապերով, ինչպէս նաեւ անձնական յատկանիշերով: Սադուն Բ-ի շեշտակի բարձրացման գործում որոշակի դեր խաղաց նաեւ տարածաշրջանում առաջացած ռազմա-քաղաքական իւրօրինակ կացութիւնը, մոնղոլական տիրապետութեան առանձնատուկ միջնորդը: ԺԳ- դարի երկրորդ կէտում ինչպէս իշխանութեան կենտրոնում, այնպէս էլ ծայրամասերում որոշ անձնաւորութիւնների ու տոհմերի առաջին պլանում յայտնուելը եւ ապա գահավէժ կործանուելը առօրէական երեւոյթ էին եւ բացատրուում էին մոնղոլական քոչուորական աւագանու նպատակաւորուած քաղաքականութեամբ: Ստեղծելով ուժերի այնպիսի հաւասարակշռութիւն, որը չափազանց անկայուն էր եւ ցանկացած պահին կարող էր խախտուել որեւէ կողմի նախապարձակ գործողութիւններով, մոնղոլական իշխանաւորները մշտական լարուածութեան մէջ էին պահում նուաճած երկրները: Վրացական թագաւորութիւնում եւս մոնղոլները նոյնատիպ իրադրութիւն էին ստեղծել եւ խրախուսում էին կենտրոնական իշխանութեանը ընդդիմադիր ուժերի հանդէս գալը: ԺԳ- դարի 70–80ական թուականներին Սադուն Բ-ն եւ Խուժլու Բուղան էին մոնղոլական քաղաքականութեան գործուն իրականացնողները եւ սատարում էին ոչ միայն մոնղոլական ամենաբարձր վերնախաւի, այլեւ իշխանութեան փաստական կառավարիչ Սահիր Զուլէյսու ու անձամբ իշխանների կողմից: Սակայն թագաւորական իշխանութեանը հակադիր նոր եւ հզօր քաղաքական ուժի երկարատեւ գոյութիւնը եւս չէր մտնում մոնղոլների քաղաքական ծրագրերի մէջ. նրանք ակնյայտօրէն գերադասում էին ասպարէզը տրամադրել ժամիշխանների մրցակիցներին եւ այդպիսով դիւրութեամբ վերահսկել իրադրութիւնը: Նման պայմաններում Մահկանաբերդցիների ճակատագիրը կանխորոշուած էր եւ նոյնպիսի արագութեամբ նրանք կարող էին այնպատութեան գիրկը անցնել իշխանութեան կենտրոնում անընդհատ տեղի ունեցող քաղաքական

ցնցումների որեւէ մէկի հետեւանքով: Հենց այդ էլ վերջիվերջոյ կատար-
ւեց ժԳ. դարի եզրափակիչ տասնամեակում, 1293 թ. Խուլթլու Բուղայի
մահապատժից յետոյ: Այսպիսով, Մահկանաբերոցիների երկրորդ բարձ-
րացումը տեւեց շուրջ երեք տասնամեակ եւ անակնկալ կերպով ընդ-
հատուեց: Այս անգամ, սակայն, տոհմի դիրքերը խարխուլուեցին վերջնա-
կանապէս: Հողային տարածքների կորուստը, առաւել եւս քաղաքների
յարքունիս գրաւումը, անվերադարձօրէն զրկեցին Մահկանաբերոցի-
ներին նոյնիսկ Հայաստանում նախկին դիրքը պահպանելու հնարա-
ւորութիւնից: Սկզբնաղբիւրներում վերջին անգամ յիշուելու ժամանա-
կաշրջանում (1367 թ.) նրանք արդէն վերածուել էին չարքային հողատէ-
րերի:

Գ. ՏԻՐՈՅԹՆԵՐԸ ԵՒ ՏԱՐԱԾՔԱՅԻՆ ԿԱՊԵՐԸ

Մահկանաբերոցիների բուն տիրոջթները գտնուում էին Աղստեւ
գետի հովտում, Մահկանաբերդի գաւառում²⁹: ԺԲ. դարի 50–70ական թթ.
Վասակն ու Ամիր–Քուրդը կալուածքներ ունէին Կարնոյ երկրում: Այդ
տարածքների յետագայ ճակատագիրը չի լուսարանուում սկզբնաղբիւր-
ներում, սակայն Խառաս Ա.ի ամուսնական կապերը մահմեդական աշ-
խարհի հետ եւ արեւելեան անունների տարածուածութիւնը տոհմում
մտածել են տալիս, որ Մահկանաբերոցիները վերջնականապէս չէին խզել
աղբաններ իրենց հեռաւոր տիրոջթների հետ: Տոհմի անդամների տարած-
քային կապերը չափազանց ընդգրկուէն էին ժԳ. դարի երկրորդ կէսում:
Խառասեանները գործում էին Արագածոտնում եւ Շիրակում: Նրանք
գանձագին գիւղ ունէին Արագածոտնում (Աշնակ), հասութարեր ձեռ-
նարկութիւն՝ Անիի մերձակայքում (Տիգնիս), հնարաւոր է նաեւ այլ տի-
րոջթներ՝ Շահնշահեանների տան սահմաններում: Ինչ վերաբերում է Սա-
ղուն Բ.ին եւ Խուլթլու Բուղային, ապա նրանք ընդարձակեցին իրենց
տիրոջթները նախ ի հաշիւ Չաքարեանների, ապա նաեւ՝ վրաց արքաների:
ԺԳ. դարի 60ական թուականների վերջում Սաղուն Ա.ին էր պատկանում
մինչ այդ Շահնշահ Ա.ի սեփականութիւնը կազմող Աշտարակը³⁰: Այստեղ
Մահկանաբերոցիները պահպանել էին իրենց իշխանութիւնը նաեւ
Խուլթլու Բուղայի օրօք, գոնէ մինչեւ 1285 թուականը³¹: Սակայն Աղբուղա
Բ. Չաքարեանի արձանագրութիւնների առկայութիւնը Աշտարակում³²
ԺԴ. դարի առաջին տասնամեակներին՝ ցոյց է տալիս, որ Չաքարեանները
վերականգնել են դիրքերը Արագածոտնի այդ մասում: Հայր ու որդի
Մահկանաբերոցի իշխանները վրաց արքաներից ժամանակաւորապէս
տիրացել էին Կարսին, Դմանիսին, Թելաւին, Բելաքանին³³: Սաղուն Բ.ն
մոնղոլների կողմից որոշ ժամանակ կառավարիչ էր նշանակուած Սասու-
նում: Աթարէկի եւ ամիրսպասալարի զոյգ պաշտօնները կորցնելուց եւ

առհասարակ վրաց արքունիքի հետ կապերը խզելուց յետոյ Մահկանաբերոցիները ժԳ- դարի վերջում գրկուեցին խոշոր տիրոջթներին: Ինչպէս երեւում է, նրանք համեստ տարածքներ էին պահպանել անգամ Հայաստանում:

Գ. ԳԱԽԱՆԱԿԱՆ ԿՈՂՄՆՈՐՈՇՈՒՄԸ ԵՒ ԷԹՆՈՍՇԱԿՈՒԹԱՅԻՆ ԳԻՄԱՊԱՏԿԵՐԸ

Մինչեւ իրենց երկրորդ բարձրացումը Մահկանաբերոցիները անվերապահօրէն հետեւողական միաբնակներ էին: Այսպէս, Ամիր-Քրդի հովանաւորութիւնն էին վայելում Մորոյ Չորոյ վանքը³⁴, որդիները եւ դուստրը կապուած էին Նոր Գետիկի³⁵, Մակարավանքի³⁶, Շիւմուրատի³⁷ վանքերի հետ: Սաղուն Բ-ի եւ Խուլթու Բուղայի օրօք, նրանց հովանաւորութեամբ վերելք էին ապրում միաբնակ հոգեւոր եւ ուսումնագիտական կենտրոններ՝ Առաքելոց, Կիրանց, Դեղձուտի վանքերը³⁸: Եւ այնուամենայնիւ, սկսած Ամիր-Քրդից, Մահկանաբերոցիները ամէնասերտ ու երկարատեւ փոխյարաբերութիւններ ունէին Հաղբատի հետ³⁹: Բաւական է ասել, որ այստեղ են թաղուել Ամիր-Քուրդը, նրա որդիները, Սաղուն Բ-ն: Հաղբատում է գտնուում Խուլթու Բուղայի որմնանկարը⁴⁰:

Իրենց հերթին, Խաւաասեանները ժԳ- դարի առաջին կէսին հոգեւոր կենտրոն եւ տոհմական հանգստարանի վայր էին ընտրել Բազնայրի վանքը Շիրակում⁴¹:

Մահկանաբերոցիներին՝ ժԳ- դարի երկրորդ կէսում երկաբնակութեանը հարելու վերաբերեալ որեւէ տեղեկութիւն աղբիւրներում չի պահպանուել: Սաղուն Բ-ի կողմից Գարեջայի վանքերին հովանաւորութիւն ցոյց տայլ⁴², Խուլթու Բուղայի՝ Երուսաղէմի Սուրբ Խաչ վանքի «ազապ»-ներում յիշատակուելը⁴³, Վանենիի հնարաւոր յուղարկաւորութիւնը Քորայրի երկաբնակ վանքում⁴⁴, այնուամենայնիւ փաստեր են, որոնք մտածել են տայլիս, թէ՛ այդպիսի դաւանական անցումը լիովին բացառուած համարել չի կարելի: Թէ՛ միաբնակ եւ թէ՛ երկաբնակ վանքերին նիւթապէս սատարելու փաստերը վկայում են, որ Մահկանաբերոցիներին գործունէութիւնը Չաքարեանների լայնախոհ դաւանական քաղաքականութեան գուգահեռն է ներկայացրել:

Բազմազան են եղել Մահկանաբերոցիների միջէթնիկական առընչութիւնները: Հայկական տոհմերից զատ նրանք ինամիական կապեր էին հաստատել ժամանակի նշանաւոր վրացական եւ տարաէթնիկ մահմեդական (պարսկականից բացի՝ հնարաւոր է նաեւ թուրքական) ընտանիքների հետ: Առաջին բարձրացման ժամանակ նրանք բարեկամացել էին Չաքարեանների եւ արցախեան ազդեցիկ տոհմերից Հաթերբցիների, երկրորդ վերելքի փուլում՝ Օրբելեանների, կրկին անգամ Չաքարեանների,

վրացի Ջաղելիների եւ անգամ արքայական տան հետ: Մասմեղական ընտանիքների հետ ամուսնական առնչութիւններ են հաստատել թէ՛ Խաւոսեանները եւ թէ՛ աւագ տոհմաճիւղը: Մահկանաբերոցիների համար, ելնելով նրանց գործունէութեան ծաւալման տարածաշրջանի թելադրանքից, անշուշտ բնորոշ է եղել լեզուների (հայերէնից ու վրացերէնից բացի, նաեւ արեւելեան) լաւ իմացութիւնը, թէեւ ուղղակի վկայութիւններ ունենք միայն Սաղուն Բ-ի վերաբերեալ:

Տոհմի մշակութային ակտիւութիւնը (եկեղեցաշինութիւն, ձեռագրերի պատուիրատուութիւն) զգալի է եղել միայն ԺԲ- դարի վերջին քառորդում – ԺԳ- դարի սկզբում: Մահկանաբերոցիների համար, ելնելով նրանց գործունէութեան պարբերացումից, կենսագործունէութեան աշխարհագրական շրջանակներից, մշակութային միջավայրից եւ այլ հանգամանքներից, յատկանշական է եղել «աշխարհաքաղաքացիութեան ոգին»: Տոհմի անդամները, առաւել հզօրութեան երկու փուլում էլ, աչքի են ընկել փոխադարձ շփումների մէջ մտնելու կարողութեամբ, որը անհետեւանք չէր մնալու՝ մշակութային նախնական նկարագրի վրայազդելու եւ Մահկանաբերոցիների հայկական էթնիկ դիմապատկերը զգալիորէն բարդացնելու հայեցակէտերից: Ցաւօք, այդ շափագանց ուշագրաւ գործընթացների մասին առայժմ կարելի է միայն կուսնումներ անել:

Ե. ՏՈՂԱՎՈՐՈՒԹԻՒՆԸ

Մահկանաբերոցի տէրեր (Սաղունեաններ)

1. Վահրամ (ծնուել է, հաւանաբար ԺԱ- դարի վերջում–գործել է ԺԲ- դարի առաջին կէսում): «Իշխան» տիտղոսով նրան յիշատակում է Մխիթար Գոշը⁴⁵: Պէտք է ենթադրել, որ նա եւս իշխում էր Մահկանաբերոցի գաւառում: ԺԲ- դարի կէսերին նա այլեւս կենդանի չէր եւ ասպարէզում էին նրա որդիները:

2. Վասակ, որդի Վահրամի (ծնուել է ԺԲ- դարի առաջին քառորդում–մահացել է 1160 թուականից յետոյ): «Շահապ քաղաքին Տփխեաց» – քաղաքապետ էր դեռ եւս Դեմետրէ Ա-ի օրօք: 1154 թ., երբ Կարինի ամիրա Սալդուխը (մօտաւորապէս 1153–1164) գերի ընկաւ Անիի մօտ եւ բերուեց Տփխիս, Վասակը մեծապէս օգտակար եղաւ Սալդուխին: Ցայտնի են Վասակի եւ նրա եղբայրների սերտ կապերը Դեմետրէ Ա-ի որդի Դաւիթ Ե-ի հետ: Դաւիթ Ե-ի կարծատեւ գահակալութիւնից յետոյ, երբ վրաց թագաւորութեան գլուխ կանգնեցին վանքից պալատ վերադարձած Դեմետրէ Ա-ն ու կրտսեր որդի Գէորգի Գ-ն (1156–1184), Վասակն ու եղբայրները փախան Կարին: Այստեղ նրանց «խնդութեամբ եւ մեծարանօք» ընդունեց Սալդուխ ամիրան⁴⁶: Վասակն, անշուշտ, շարունակում էր պայքարը Գէորգի Գ-ի դէմ՝ դաշնակցելով Հայաստանում հաստատուած

մահմետական կազմաւորումների հետ: Ամենայն հաւանականութեամբ, նա մասնակցում էր Շահ—Արմէնի աներ Ատրատինի եւ վրացական բանակի միջեւ 1160 թ. Հոկտեմբերին Օլթիի գաւառում տեղի ունեցած ճակատամարտին⁵⁷: Վախճանուել է Կարինում եւ թաղուել քաղաքի սուրբ Աստուածածին եկեղեցում⁵⁸:

3. Քուրդ (Ամիր—Քուրդ), որդի Վահրամի (ծնուել է ժ.Ք. դարի առաջին քառորդի վերջում կամ յաջորդ քառորդի սկզբում—մահացել է ժ.Ք. դարի 90ական թուականներին): Համագործակցում էր եղբոր հետ եւ որոշակի դեր էր կատարում Տփիսիսի կառավարման գործում դեռեւս ժ.Ք. դարի կէսերին: Աւագ եղբոր մահից յետոյ, երբ Վասակն ու եղբայրները գործում էին Կարինում, նրան անցաւ տոհմի աւագութիւնը⁵⁹: Որոշ ժամանակ անց Ամիր—Քուրդը հաշտուել է Գէորգի Գ.ի հետ եւ վերադարձել է վրացական թագաւորութիւն՝ կրկին ստանձնելով Տփիսիսի քաղաքապետի պաշտօնը: Ապացուցել է իր հաւատարմութիւնը կենտրոնական իշխանութեանը եւ կարեւոր դեր է կատարել մեծատոհմիկ աւատատէրերի գլխաւորած 1176—1177 թթ. խոշոր ապստամբութեան ճնշման գործում: Նա էր, որ Մահկանարբերդի գաւառում ջախջախեց Լիպարիտ Օրբելու գլխաւորած ապստամբական ջոկատը եւ հարկադրեց ապստամբների մեծ մասին պաշտպանութեան անցնել Լոռէ բերդում⁶⁰: Տփիսիսի ամիրան էր յաջորդ տարիների ընթացքում, թէեւ անյայտ է մնում նրա պաշտօնավարութեան աւարտատարին: Հաւաստի է սակայն, որ նա ամիրայի պաշտօնում չէր արդէն 1185 թուականի սկզբում: Նրա պաշտօնանկութիւնը, հաւանաբար, տեղի է ունեցել 1184—1185 թթ., երբ փոփոխութիւնների ենթարկուեց ողջ արքունական պաշտօնէութիւնը⁶¹: 70ական թուականների վերջում — 80ական թուականների սկզբին նա եռանդուն եկեղեցաշինական գործունէութիւն է ծաւալել Հիւսիսային Հայաստանում կամ էլ նիւթապէս սատարել է հին հոգեւոր կենտրոններին: Մասնաւորապէս, նա 1181 թ. օժանդակել է Սանահինի Ամենափրկիչ եկեղեցու ժամատան կառուցմանը⁶², Գէորգի Գ.ի շնորհած հրովարտակով հարկերից ազատել է Մորոյ Ձորոյ վանքը⁶³, իր մասնակցութիւնն է բերել Հաղարծինի վանքի նորոգմանը⁶⁴: Վախճանուել է ժ.Ք. դարի 90ական թուականներին եւ յուղարկաւորուել Հաղրատում⁶⁵:

4. Սարգիս (Ամիր—Սարգիս), որդի Վահրամի (ծնուել է, հաւանաբար, ժ.Ք. դարի երկրորդ քառորդում—մահացել է, թերեւս, միեւնոյն դարի վերջին քառորդում): Անկասկած եղբայրների օգնականն է եղել Տփիսիսի կառավարման գործում: Այստեղից էլ «ամիր» տիտղոսով յիշատակութիւնը աղբիւրներում⁶⁶: Հաւանաբար, Կարինից հայրենիք էր վերադարձել Ամիր—Քուրդի հետ միաժամանակ: Ամիր—Սարգսից են սերում Խաւոսեանները:

5. Սահակաղուխտ, դուստր Վահրամի (ծնունել է ժԲ. դարի առաջին տասնամեակներին մահացել է, հաւանաբար, ժԳ. դարի սկզբին): Գանձակեցին բացորոշում է այն սերտ կապը, որ գոյութիւն ունէր ժԲ. դարի երկրորդ կէսում Մահկանաբերոցիների եւ Չաքարեանների տոհմերի միջեւ: Ըստ պատմիչի, Չաքարէն եւ Իւանէն որդիներն էին «քեռ բարեպաշտ իշխանին Քրդին»⁵⁷, ուստի Իւանէն սիրով ընդառաջեց Ամիր-Քրդի մտերիմ Մխիթար Գոշի՝ Գետիկի վանքի համար նոր տեղ յատկացնելու խնդրանքին⁵⁸: Չաքարեանների հետ ազգակցութիւնը ընդգծում էին նաեւ Ամիր-Սարգսի սերունդները, հպարտութեամբ նշելով, որ նա «էր եղբայր մաւր կեսառոսաց Հայրոց եւ Վրաց եւ ամենայն Ափխազաց, բարեպաշտիցն եւ Աստուծով զաւրացելոցն մեծին Չաքարիայի եւ Իւանէի»⁵⁹: Ինչպէս երեւում է, Սահակաղուխտն ամուսնուց զգալիօրէն ուշ է վախճանւել եւ ակնատես է եղել որդիների գլխաւոր յաջողութիւններին: Յուղարկաւորման տեղը (Անի) եւ տապանաքարի բովանդակութիւնը («սուրբ եւ մեղսաքաւիչ պատարագն որ սմա կատարի Սահակաղուխտ է, ծնաւդի Չաքարէա. եւ Իւանէի թագաւորաց Հայոց»)՝ վկայում են, որ Սահակաղուխտը կնքել է իր մահկանացուն Անիի ազատագրումից (1199 թուական) յետոյ եւ երբ արդէն աւարտուել էր Չաքարեանների թագաւորական ծագման տեսութեան մշակումը: Առաւել հաւանական է, որ Սահակաղուխտը վախճանուել է ժԳ. դարի առաջին տարիներին, ամուսնուց շուրջ մէկուկէս տասնամեակ յետոյ:

6. Սաղուն Ա.⁶¹ որդի Ամիր-Քրդի (ծնունել է, հաւանաբար, ժԲ. դարի երրորդ քառորդում—մահացել է 1205 թուականից յետոյ, թերեւս ժԳ. դարի առաջին երեք տասնամեակների ընթացքում): Որոշակի իշխանութիւն ունէր դեռեւս հօր կենդանութեան օրօք: Այսպէս, նա «մեծ իշխան» է անուանուել 1181 թուականին, Շիմոբրատի վանքի արձանագրութիւնում⁶²: Յիշատակուում է որպէս «մեծ եւ հզաւր իշխան Կայնոյ» նաեւ Մակարավանքի 1205 թուականի վիմագրերից մէկում⁶³: Աւելի վաղ, ժԲ. դարի 90ական թուականներին, եղբօր եւ քրոջ հետ միասին գործուն մասնակցութիւն է ունեցել Նոր Գետիկի կառուցմանը⁶⁴: Այսպիսով, հօր մահունից յետոյ Սաղուն Ա.ն շարունակում էր պահպանել տոհմական կալուածքները հայրենական զաւառում: Սաղուն Ա.ն հանդէս է եկել նաեւ որպէս մեկենաս: Նրա ծախսով ձեռագիր է ընդօրինակուել Նոր Գետիկի վանքում⁶⁵:

7. Դաւիթ, որդի Ամիր-Քրդի (ծնունել է, հաւանաբար, ժԲ. դարի երրորդ քառորդում—մահացել է, թերեւս, ժԳ. դարի առաջին տասնամեակների ընթացքում): ժԲ. դարի 90ական թուականներին օժանդակում էր Մխիթար Գոշին՝ Նոր Գետիկի վանքի շինարարական աշխատանքների ընթացքում⁶⁶: Յայտնի է որպէս այժմ Նոր Զուղայում պահուող նշանաւոր

Աւետարանի ստացող⁶⁷: Յուդարկաւորուել է Հաղբատում, տոհմական հանգստարանում⁶⁸:

8. Արզու Խաթուն, դուստր Ամիր-Քրդի (ծնուել է, մօտաւորապէս, ժ.թ. դարի երրորդ քառորդում—մահացել է 1214 թուականից յետոյ): Հաթերքի իշխան Վախտանգ Բ-ի կինն էր: Աչքի է ընկել մշակութային արդիւնաւէտ գործունէութեամբ: Գանձակեցին հիացմունքով է խօսուում նրա եւ դստրերի գործած «գարմանալի տեսողաց» եկեղեցական վարագոյրները ու խորանի ծածկոցների մասին⁶⁹: Յայտնի է դարձել նաեւ եկեղեցաշինական գործունէութեամբ: «Ձեռնտու» է եղել Նոր Գետիկի կառուցմանը⁷⁰: Ամուսնու եւ երկու որդիների մահից յետոյ, 1214 թուականին նրան է վիճակուել աւարտել Դադիվանքի գմբէթաւոր եկեղեցու շինարարութիւնը⁷¹:

9. Շերբարոք, որդի Սաղուն Ա-ի (ծնուել է, հաւանաբար, ժ.թ. դարի վերջին քառորդում—մահացել է ժ.Գ. դարի առաջին կէսում): Գլխաւորում էր Մահկանաբերդցիների տոհմը՝ ընտանիքի ժամանակաւոր անկման փուլում: Սաղուն Բ-ի նախնիներին թուարկելու առիթով, նրան երկիցս յիշում է Գանձակեցին⁷²:

10. Սաղուն Բ. որդի Շերբարոքի (ծնուել է, հաւանաբար, ժ.Գ. դարի առաջին քառորդում—մահացել է 1282 թուականին): Սաղուն Բ-ի շէշտակի բարձրացման սկզբնական փուլում որոշակի դեր են կատարել նրա Ֆիզիքական կարողութիւնները: Նա յայտնի էր որպէս «այլ անձնեայ եւ քաջամարտիկ»⁷³, «բարեսես, ուժով յոյժ զօրեղ», «նշանաւոր, ընտիր ըմբիշ, վարպետ նետաձիգ»⁷⁴: Հենց այդ յատկանիշերի շնորհիւ Սաղուն Բ-ն գրաւեց Հուլաու իլխանի (1256—1265) ուշադրութիւնը, քանի որ մոնղոլներն առանձնապատուկ հիացմունքով էին վերաբերում նշանաւոր ըմբիշներին⁷⁵: Այնուամենայնիւ, մինչեւ ժ.Գ. դարի 50ական թուականների վերջը Սաղունը գործում էր սահմանափակ շրջանակներում, քանի որ նա ընդամէնը Աւագ Չաքարեանի դուստր Խոջաքի խնամակալն էր եւ սենեկապետը⁷⁶: Այսպէս, 1258 թուականին նա, հաւանաբար, դեռեւս Խոջաքին ենթակայ պաշտօնեայ էր⁷⁷, համեստ ազդեցութեամբ: Սաղուն Բ-ի սրընթաց վերելքը սկսուեց յաջորդ տարում, երբ Հուլաու իլխանը արշաւանք ձեռնարկեց դէպի Ասորիք, իսկ վրաց թագաւոր Ուլու Դաւիթը (թագաւորել է 1246 թ.) հրաժարուեց մասնակցելու այդ ձեռնարկմանը ու ապստամբութիւն բարձրացրեց: ժ.թ.—ժ.Գ. դ.դ. պարսիկ պատմիչ Ռաշիդ աղ—Դինը առանձնացնում է Սաղուն Բ-ի վաստակը Հալէպի ամրոցի առման գործում⁷⁸, որը տեղի է ունեցել 1259 թուականի վերջում — 1260 թուականի սկզբում: Հաւանաբար, նոյն 1260 թուականին էլ Հուլաու իլխանի սիրելին դարձած Սաղունը միջնորդի դեր ստանձնեց մոնղոլների եւ սասունցիների միջեւ, որոնք պատրաստակամութիւն էին յայտնել,

հաւանաբար որոշակի պայմաններով, կամաւոր ենթարկուել նուաճող-ներին: Ինչպէս երեւում է, Սաղունը կարողացել էր գլուխ բերել այդ գործը, եւ նրան էր յանձնուել Սասունի կառավարումը⁷⁹:

Սաղունը կրկին ցուցադրեց իր դիւանագիտական տաղանդը 1261 թուականին, որպէս թարգման, բայց իրականում իրրեւ բանակցութիւնների անուղղակի մասնակից հանդէս գալով Հուլաուի նստավայրում: Երբ 1259–61 թուականների հայ–վրացական երկրորդ ապստամբութիւնը անյաջողութեամբ աւարտուեց, մոնղոլները հարցաքննութիւն կազմակերպեցին՝ հաշիւ պահանջելով Ուլու Դաւթից եւ նրա մերձաւոր զինակից Սարգիս Ջաղելուց: Իլխանական նստավայրում տեղի ունեցող այդ հաւաքի ժամանակ «Սաղունը բարօք թարգմանում էր, ձեւակերպում թագաւորի ասածները, որովհետեւ թագաւորը փոքր ինչ կարկամում էր. Սաղուն Մահկանաբերդցին լաւ էր ճարտասանում»⁸⁰: Վերջիվերջոյ, բանակցութիւնները ընդհատուեցին Ոսկէ Յորդալի խան Բերքալի անակնկալ յարձակման լուրն ստացուելուց յետոյ: Ուլու Դաւթից եւ Սարգիս Ջաղելին Բերքալի դէմ կռիւների ընթացքում աչքի ընկան քաջութեամբ, եւ սկիզբ դրուեց նրանց ու մոնղոլների միջեւ յարաբերութիւնների կարգաւորմանը:

Վրաստանում եւ Հայաստանում Սաղունի դիրքերն աւելի ամրապնդուեցին Աբաղա իլխանի (1265–1282) գահ բարձրանալուց յետոյ: Ըստ Ռաշիդ աղ–Դինի, իշխանը «յանձնեց Վրաստանը Դաւթին եւ նրա որդի Սաղունին»⁸¹: Այսպիսով, վրաց արքայ Ուլու Դաւթի հետ միասին, որին մոնղոլները չէին վստահում, Սաղունին էր յանձնուել Վրաստանի կառավարումը: Պատմիչն, անտեղեակ լինելով իրական կացութեանը, Սաղունին նոյնիսկ համարել է Ուլու Դաւթի որդի եւ լիովին բնականոն է համարել իշխանութեան աննախադէպ կենտրոնացումը հզօր մեծատոհմիկի ձեռքում: Հասկանալի է, որ նման սխալը բացատրում է վրաց արքունիքում Սաղունի ձեռք բերած բացառիկ դիրքով եւ ազդեցութեամբ⁸²: Սաղունի յետագայ բարձրացումը Աղաբա իլխանի օրոք նշում է նաեւ Վրաց ժամանակագրութիւնը⁸³: Սաղունը, դառնալով «սիրած մեծ Ապաղանի»⁸⁴, անշուշտ, առաջինն էր համարւում հայ իշխանների շարքում, ինչպէս այդ հաւաստւում է սկզբնաղբիւրներից⁸⁵:

Սաղուն Բ-ի գործունէութեան այս փուլում ուշադրութիւն է գրաւում նրա սերտ կապը իլխանութեան բարձրաստիճան ըլրոկրատիայի հետ: Այդ ջերմ փոխյարաբերութիւնները Մահկանաբերդի տիրակալի վերելքի կարեւորագոյն լծակն էին ներկայացնում: Վրաց ժամանակագրութիւնը նրա զօրեղացումը ուղղակիօրէն առնչում է Մեծ Սահիբ Դիւանի Ծամս աղ–Դին Մուհամէտ Ջուվէյնիի հովանաւորութեան հետ: Առաւել եւս, երբ Սաղունը Սահիբ Դիւանի կնոջ՝ Սոչաք Չաքարեանի

սենեկապետն էր, հեջիբը⁸⁶: Ինքը՝ Սադունը, չէր յապաղել խնամիական կապ հաստատել իրանական բիւրոկրատական վերնախաւի հետ: Գիւրջիստանի վիլայեթի վալիներից Խոջա—Ազիզի դուստրը դարձել էր Սադունի կինը⁸⁷: Հենց այն Խոջա—Ազիզի, որին վրաց թագաւոր Ուլու Դաւիթը համարում էր իրեն հասած բոլոր արհաւիրքների սկզբնապատճառ եւ ժամանակին՝ հայ—վրացական երկրորդ ապստամբութեան միջոցին, պահանջում էր իրեն յանձնել այդ պաշտօնեային⁸⁸:

Նախկին հեջիբի, արդ՝ արքունիքի ամենահզօր պաշտօնեայի գլխաւոր հոգսը դարձաւ տիրոջ թնեքի ընդարձակումը, ընդ որում նա ձգտում էր տիրանալ դրամական խոշոր եկամուտ բերող քաղաքների, քանի որ «հայրենիքն արժան էր եւ ոսկին թանգ»⁸⁹: Նրան «բազում երկրներ պարզեց» դեռեւս Ուլու Դաւիթը⁹⁰, բայց նոր կալուածքների ձեռքբերման համար առանձնապատուկ նպաստաւոր պայմաններ ստեղծուեցին ժԳ-դարի 70ական թուականների սկզբին, երբ վրաց Դեմետրէ Բ- թագաւորը (1271—1289) անչափահաս էր եւ իր խնամակալ (աթաբէկ) նշանակուած Սադունի փաստական վերահսկողութեանը ենթարկուած լինելով՝ զուրկ ինքնուրոյն քաղաքականութիւն վարելու հնարաւորութիւնից: 1272 թուականին Սադունը վրաց արքայից ստացաւ երկու քաղաք թագաւորութեան արեւելքում՝ Թելաւր եւ Բելաքանը, իսկ յաջորդ տարում տիրացաւ Դամասիսին եւ Կարսին⁹¹: Այսպիսով, 1272 թուականին ողջ վրաց թագաւորութեան աթաբէկ եւ միաժամանակ ամիրսպասալար ճանաչուած Սադունի⁹² տիրոջ թնեքը հսկայական տարածք էին ընդգրկում, ընդ որում կարեւոր ինչպէս ռազմա—քաղաքական, այնպէս էլ տնտեսական առումով: Հայաստանում Սադունը ժԳ- դարի 60—80ական թուականների սկզբին հանդէս է գալիս ոչ միայն տոհմական տիրոջ թնեքի վիժական յուշարձաններում⁹³, այլեւ Աւագեան տան տարածքում⁹⁴, Շահնահեաններին պատկանող Արագածոտնում⁹⁵, եւ անգամ Զաքարեանների հին «ոստան» Խոռակերտում⁹⁶: 70ական թուականներին նրա «աթաբէկ» եւ «ամիրսպասալար» տիտղոսներով հանդէս գալը դառնում է սովորական երեւոյթ⁹⁷: Մինչեւ իր մահը 1282 թուականին⁹⁸, Սադուն Բ-ն, անշուշտ, առաւել հզօր եւ ազդեցիկ անձնաւորութիւնն էր Հայաստանում եւ Արեւելեան Վրաստանում:

Սադուն Բ-ն իրաւամբ կարող է համարուել հայոց վանքերի աչքի ընկնող հովանաւոր: Նա Հաղբատի «տէրն» էր⁹⁹, կապեր ունէր Մահկանարեղի գաւառի հոգեւոր կենտրոններից Առաքելոց վանքի հետ¹⁰⁰, նուիրատուութիւն է կատարել Աղջոց վանքին¹⁰¹: Սադուն Բ-ի դաւանական կողմնորոշման մասին պատկերացում տուող փաստերից է նաեւ նրա մասնակցութիւնը հայոց եկեղեցու Զազաւանից ժողովին¹⁰²: Միաժամանակ, նա յարաբերութիւններ էր պահպանում նաեւ երկաւրնակ հոգե-

ւոր կենտրոնների հետ: Այսպէս, «կենդանութեան օրօք ինքը վճարեց Գարեջայի տասներկու անապատների մայն ու դալանը»¹⁰³:

Մահկանաբերդի տիրոջ զիմապատկերը լրացնում են նրա ընտանեկան կեանքի մասին տուեալները: Ստոյգ յայտնի է, որ նա ամուսնացել էր առնուազն երեք անգամ: Խոջա—Ագիգի ընտանիքի հետ խնամիանալուց յետոյ, Սաղունը նմանապէս կապուել էր Ախալցխիսէջիների տոհմի հետ¹⁰⁴: Ի վերջոյ, ժԳ. դարի 70ական թուականներին նա հարկադրեց Դեմետրէ Բ.ին՝ կնութեան տալ իրեն թագաւորի քրոջը՝ Թամարին¹⁰⁵: Ի դէպ, բացառուած չէ, որ մինչեւ Հուլաւուի բարեհաճութեանը արժանանալը նա փեսայացած լինէր որեւէ հայկական կամ վրացական տոհմի: Սաղունի ընտանեկան վարքագիծը այն հանգամանքներից է, որ նպաստել է Սաղունի ընդգծուած բացասական գնահատականին¹⁰⁶:

Սաղուն Բ.ն յուղարկաւորուած է Հաղբատում¹⁰⁷:

11. Խուժիւր Բուղա, որդի Սաղուն Բ.ի (ծնուել է ժԳ. դարի կէսերին — 60ական թուականներին) — մահապատիժի է ենթարկուել 1293 թուականին): Անշուշտ, առաջին հերթին նրան պէտք է նկատի ունենալ 1268 թուականի Աշտարակի արձանագրութիւնում յիշատակուած Սաղունի որդիների շարքում¹⁰⁸: Հօր մահից յետոյ Խուժիւր Բուղան բաւականաչափ ազդեցիկ էր՝ Սաղուն Բ.ի պաշտօններին յաւակնելու համար: Թագաւորական իշխանութեան համար՝ մոնղոլների հետ սերտօրէն համագործակցող Խուժիւր Բուղան ոչ պակաս վտանգ էր ներկայացնում, քան Սաղուն Բ.ն, եթէ նաեւ նկատի ունենանք, որ նրա քեռին, Խոջա Ագիգի որդի Իլ—Խուժիւրն, Դեմետրէ Բ.ի ոխերիմ թշնամին էր: Հասկանալի է, որ ազգականները համատեղ էին գործում վրաց արքայի դէմ¹⁰⁹: Բախումները Դեմետրէ Բ.ի (յետագայում՝ նրա յաջորդների) եւ Խուժիւր Բուղայի միջեւ անընդմէջ մաքառման բնոյթ էին կրում եւ ողբերգական վախճանի հանգեցրեցին երկու կողմերին էլ:

Սաղուն Բ.ի մահից յետոյ Դեմետրէ Բ.ն հայրական պաշտօններից Խուժիւր Բուղային շնորհեց միայն սպասալարութիւնը: Նա, թերեւս ոչ առանց հիմքի, երկիւղ էր կրում, որ երկու պաշտօնները համատեղելու դէպքում Խուժիւր Բուղան չափազանց մեծ վտանգ կը ներկայացնի¹¹⁰: Դժգոհ Խուժիւր Բուղան ապաստան դտաւ Ահմէտ իլխանի (1282—1284) արքունիքում եւ ծառայելով Ահմէտին՝ այլեւս չէր ենթարկում վրաց արքային¹¹¹: Աւելին, նա գործուն մասնակցութիւն բերեց այն իրադարձութիւններին, որոնց հետեւանքով էականապէս փոխուեց կացութիւնը ամբողջ իշխանութիւնում: 1284 թուականի Յունուարին Ահմէտ իլխանի հրամանով մահապատիժ ենթարկուեց նրա եղբայր Ղոնղուրթայը (Ղոնղրաթայ)¹¹²: Այնուհետեւ նոյն ճակատագրին արժանացան Արուլեթիսաճէ երկու եղբայրները, Ցագանի որդիները: Ընդ որում, ինչպէս պըն-

դում է Վրաց ժամանակագրութիւնը, այդ տեղի ունեցաւ Խուժըու-
Բուղայի խարդաւանքների հետեւանքով¹¹³։ Երկու տոհմերի մրցակցու-
թիւնը, որը պայմանաւորուած էր ինչպէս ամիրսպասալարութեան ու
աթարեկութեան պաշտօնների համար ծաւալուած պաշքարում, այնպէս
էլ Դմանիս քաղաքի պատկանելութեան հարցի շուրջ վէճով¹¹⁴, առժա-
մանակ աւարտուեց Մահկանաբերոցիների յաղթանակով։

1284 թ. գարնանը, երբ մահու կենաց գօտեմարտ ծաւալուեց Ահմէտ
իլխանի եւ գահի օրինական ժառանգորդ Արղունի միջեւ, Դեմետրէ Բ-ն
հանդէս եկաւ Ահմէտի կողմում եւ իւանէ Բ. Ջաքարեանի ու Խուժըու
Բուղայի ուղեկցութեամբ մասնակցեց դէպի Խորասան ձեռնարկուած
արշաւանքին¹¹⁵։ Սկզբում յաջողութիւնը ուղեկցում էր Ահմէտին, որը
գերի վերցրեց Արղունին եւ ի նշան շնորհակալութեան՝ ցուցաբերած
օժանդակութեան համար, վրաց արքային ենթարկեց բոլոր վրացական
իլխաններին¹¹⁶։ Նրանցից Խուժըու Բուղան բանտարկուեց եւ ազատ
արձակուեց միայն հաւատարմութեան երդում տալուց յետոյ։ Նրան
վերադարձուեցին Սաղունի կալուածները, որոնք, ինչպէս երեւում է,
մինչ այդ բռնագրաւել էր վրաց թագաւորը¹¹⁷։ Հնարաւոր է, որ հենց այդ
դէպքն է նշել Սամուէլ Անեցու երկիր շարունակողներից մէկը՝ «Դեմետր
թագաւորն զՍալատունին երկիրն խլեաց» արտայայտութեամբ¹¹⁸։

Իրադարձութիւնները, սակայն, լիովին անսպասելի շրջադարձ ունե-
ցան։ Նոյնների՝ մոնղոլ ազնուականների, մի մասը անցաւ Արղունի կող-
մը, բանտարկութիւնից ազատեց նրան եւ Ահմէտին մահապատժի ենթար-
կելուց յետոյ իլխան հուշակեց գահի օրինական ժառանգորդին։ Նման
պայմաններում վրաց արքան ճշգրիտ քաղաքական հաշուարկ կատարեց։
Նա ժամանակին անցաւ Արղունի (1284–1291) կողմը եւ համապատասխա-
նաբար շնորհների արժանացաւ։ «Սիրեաց Արղունն՝, եւ ետ նմա զամենայն
աշխարհս Հայոց՝ գտունն Աւագեան եւ գտունն Շահնշահեան եւ գԳագե-
ցին եւ գորդիան Սաղուն աթաբէկին»¹¹⁹։ Յաջորդ հինգ տարիների ընթաց-
քում ակնյայտ առաւելութիւնը վրաց արքայի կողմն էր, եւ Խուժըու
Բուղան, ինչպէս երեւում է, լիովին հաշուի էր առել ուժերի յարաբերու-
թեան մէջ կատարուած փոփոխութիւնը։ Նրա դրութիւնը պէտք է
առանձնապէս ծանրացած լինէր 1284 թուականի Հոկտեմբերից, յետոյ,
երբ մահապատժի ենթարկուեց Սաղուն Բ. ի հին բարեկամը՝ Սահիր Դիւան
Ջուվէյնին¹²⁰։ Խուժըու Բուղան հարկադրուած էր հաշտուել իրական կա-
ցութեան հետ եւ Աւագեան տանը, Դաւիթ արքայազնի մօտ, կատարել
այն պատուաւոր ծառայութիւնը, որը ժամանակին Սաղուն Բ. ի առանձ-
նաշնորհն էր։ Նա դարձել էր ապագայ Դաւիթ Ը. ի խնամակալը՝ աթաբէ-

կը, բայց այդ պաշտօնն այդ տարիներին այլեւս չունէր նախկին փայլը, քանի որ միաժամանակ շնորհւում էր նաեւ այլ իշխանների: Այսպէս, 1285 եւ 1287 թուականներին, երբ ականջիներին որոշ հարկերից ազատել են նախ՝ Դաւիթ արքայագնը, ապա «աթարէկ եւ ամիրսպասալար Խուժլու-բուղայն»¹²¹, «զաթարէկութիւն աշխարհիս Հայոց» վարում էր Տարսալիճ Օրբելեանը¹²²: Ստացւում է, որ Դեմետրէ Բ.ն թուլացրել էր իր անեղ հակա-ռակորդ Խուժլու Բուղային՝ մասնատելով մինչ այդ միասնական աթա-րէկութեան գործակալութիւնը¹²³: Սակայն Խուժլու Բուղան հեշտու-թեամբ տեղի տուողներից չէր: Այս առումով ուշագրաւ փաստ է, որ միեւնոյն 1287 թուականին գրուած մէկ այլ արձանագրութիւնում, ընդ որում Աւագեան տան ստորակալ Խաղբակեաններին պատկանող Աղջոց վանքից, Դաւիթը որպէս թագաւոր է հանդէս գալիս¹²⁴: Պէտք է կարծել, որ Խուժլու Բուղայի սանի թագաւոր ճանաչուելը, թէկուզ սահմանափակ տարածքում, ամրապնդում էր Խուժլու Բուղայի դիրքերը: Այնուամե-նայնիւ, փաստ է, որ երկու անդադրում ախոյեանները՝ Դեմետրէ Բ.ն եւ Խուժլու Բուղան ինչ—որ համաձայնութեան էին եկել:

Այդ բխրուն համաձայնութիւնն էլ արագօրէն խախտուեց 1288 թուականին: Դեմետրէ Բ.ն գործի դրեց իր բարեկամական կապը Արղունի ամենագոր պաշտօնեայի՝ Բուղայի հետ, վերջինիս օգնութեամբ երկրորդ անգամ բանտարկեց Խուժլու Բուղային եւ հարկադրեց նրան յարքունիս յանձնել Դմանիսը¹²⁵: Գօտեմարտի եզրափակիչ փուլը, որը շեքսպիրեան տրամա է յիշեցնում, այնուամենայնիւ դեռ առջեւում էր:

1288 թուականի վերջում—1289 թուականի սկզբում, օգտուելով այն հանգամանքից, որ Բուղան արագօրէն կորցնում էր ազդեցութիւնը իլխանական արքունիքում, Խուժլու Բուղան եռանդուն գործունէու-թիւն ծաւալեց: Նա եղբոր հետ միասին ուղեւորուեց Սամցխէ եւ ամուս-նանալով այդ երկրամասի տիրակալ Բեքա Ջաղելու դստեր հետ, հզոր աջակից ձեռք բերեց: Բուղայի շնորհագրկումից անմիջապէս յետոյ Բեքան պատուիրակներ ուղարկեց իլխանի մօտ եւ Սամցխէի տիրոջ ջանքերով Խուժլու Բուղային վերադարձուեցին Սաղուն Բ.ի տիրոյթները, այդ թւում Դմանիսն ու Թելալը: Դեմետրէ Բ.ից խլուեց նաեւ Աւագեան տու-նը, որը եւս յանձնուեց Խուժլու Բուղային¹²⁶: 1289 թուականի Յունուարի 16ին մահապատժի ենթարկուեց Բուղան, քիչ անց, Մարտի 12ին՝ Դեմետրէ Բ.ն¹²⁷, եւ Խուժլու Բուղան գործունէութեան լիակատար ազատութիւն ձեռք բերեց: Նա, իր խոստման համաձայն, ձեռնամուխ եղաւ Արեւելեան Վրաստանի նոր թագաւորի ընտրութեան եւ գահ բարձրացման գործին: Խուժլու Բուղան բանակցութիւններ վարեց Արեւմտեան Վրաստանի

թագաւոր Դաւիթ Նարինի հետ եւ անձամբ ուղեկցեց նրա որդի Վախտանգին Արեւելեան Վրաստան, իսկ յետոյ նաեւ Արդուն իլխանի նստավայր։ Դեմետրէ Բ-ի որդի Դաւթի փոխարէն, Խուժլու Բուղայի օգնութեամբ, գահին տիրացած Վախտանգը (որն իշխելէ 1290ականներին) իր բարերարին շնորհեց անթարէկի ու ամիրսպասալարի զոյգ պաշտօնները¹²⁸։ Դառնալով Արեւելեան Վրաստանի փաստական կառավարիչ՝ Խուժլու Բուղան չհանգստացաւ։ Այնուհետեւ նա ցանկացաւ գահ բարձրացնել գահի օրինական յաւակնորդին՝ Դեմետրէ Բ-ի որդի Դաւթին, ապագայ Դաւիթ Լ-ին, որը հօր մահապատօնից յետոյ գտնուում էր իլխանի արքունիքում։ Խուժլու Բուղայի այս նոր ձեռնարկման ժամանակը բաւականաչափ ճշգրիտ որոշուում է Վրաց ժամանակագրութեան տուեալներով։ Պատմիչն այն դնում է «Արդունի հիւանդութեան ժամանակ», որը «չարունակուեց չորս ամիս»¹²⁹։ Արդուն իշխանը մահացել է 1291 թուականի Մարտի 10ին¹³⁰, ուստի պէտք է ենթադրել, որ Խուժլու Բուղան իր ծրագիրն իրականացնելու համար որոշակի քայլեր է ձեռնարկել արդէն 1290 թուականի վերջում—1291 թուականի սկզբում։ Դաւթի եւ Վախտանգի միջեւ գահակալութեան հարցի շուրջ հակամարտութիւնները ռազմական բախումների չվերածուեցին, քանի որ 1291 թուականի վերջում—1292 թուականի սկզբում անսպասելիօրէն մահացաւ Վախտանգ թագաւորը։ Քէյլաթու իլխանը (1291—1295) Արեւելեան Վրաստանի թագաւոր ճանաչեց Դաւիթ Լ-ին, նրան ենթարկելով վրաց բոլոր իլխաններին¹³¹։

1291 թուականին տեղի ունեցաւ մոնղոլական իլխանութիւնների եւ Խուժլու Բուղայի փոխյարարերութիւնները ընդլայնող մի կարեւոր իրադարձութիւն։ Քէյլաթու իլխանի գահ բարձրանալուց (1291 թուականի Յուլիսի 23) յետոյ, երբ իլխանական զօրքը մեկնեց Փոքր Ասիա՝ Տոնդուզլու քաղաքում ծագած ապստամբութիւնը ճնշելու¹³², Խուժլու Բուղան պատասխանատու յանձնարարութիւն ստացաւ։ Նա բանակ դրեց Մուղանում՝ պաշտպանելու համար իլխանութեան սահմանները Ոսկէ Յորդայի խաների անսպասելի յարձակումներից¹³³։ Ուստի միայն վրացական աղբիւրներին անտեղեակ լինելու հանգամանքով է հնարաւոր բացատրել այն անհամոզիչ կռահումը, որը ժամանակին արել է պատմաբան Աշոտ Յովհաննիսեանը։ Նրա կարծիքով, «Ակներեւ է, որ արդէն 1291 թուականից Վրաստանում եւ Հայաստանում առկայ էր ապստամբական շարժում։ 1293 թ. Քէյլաթու խանի կողմից կառափնուած Խուժլու Բուղա Արծրունին այդ ապստամբութեան ղեկավարն էր հենց»¹³⁴։ Խուժլու Բուղայի մահապատօնի իրական պատճառը ոչ թէ հակամոնղոլական պայքարի ղեկավարումն էր, այլ նրա եւ Դաւիթ Լ-ի հակամարտութիւն-

ները: Թէեւ թէ՛ Սաղուն Բ-ի եւ թէ՛ Խուժլու Բուղայի փոխարարերու-
թիւնները մոնղոլների հետ սերտ էին եղել, իսկ 1291 թ. Մահկանաբերդի
տէրը շարունակում էր հաւատարմօրէն ծառայել մոնղոլներին, նուա-
ճողները նաեւ անսպասելի շրջադարձ էին կատարում, թոյլ չտալու հա-
մար կողմերից որեւէ մէկի չափազանց հզօրացումը: Հենց այդ էլ
վերջիվերջոյ տեղի ունեցաւ, այս անգամ ի վնաս Խուժլու Բուղայի:

1293 թուականին Դաւիթ Լ-ի եւ Խուժլու Բուղայի միջեւ
հակամարտութիւնը հասաւ իր բարձրակէտին: Արեւելեան Վրաստանի
թագաւորը դիմեց Քէյդաթու իլխանին եւ, չնայած մոնղոլական աւա-
զանու մի մասի ցուցարբերած օժանդակութեանը յօգուտ Խուժլու Բու-
ղայի, շահեց անհնազանդ ստորակայի դէմ յարուցած դատավէճը: Խուժ-
լու Բուղան փախաւ Յորդայից, բայց մոնղոլները նրան ճանապարհին
ձերբակալելով ետ բերեցին եւ ստիպեցին Դաւիթ թագաւորին՝ անձամբ
մահապատժի ենթարկել իր երբեմնի խնամակալին: Դաւիթ Լ-ն լուծեց
հօր վրէժը, իսկ իլխանը նրան շնորհեց Դամնիսն ու Խուժլու Բուղայի
ողջ ունեցուածքը¹³⁶: Որքան էլ տարօրինակ է, Խուժլու Բուղայի մահուան
ճիշդ տարեթիւը հաղորդում է Ռաշիդ աղ-Դինը: Ըստ նրա, Խուժլու
Բուղայի մահապատժը ի կատար է ածուել «հիջրայի 620 թուականի Շա-
բան ամսուայ վերջում», այսինքն՝ 1293 թուականի Օգոստոսի սկզբնե-
րին¹³⁶:

Խուժլու Բուղայի համար եւս տիպական էր աւանդական կապերի
պահպանումը միաբնակ հոգեւոր կենտրոնների հետ: Նա յիշատակում
է բազմաթիւ հայերէն արձանագրութիւններում¹³⁷, իսկ ԺԳ-ԺԴ դդ-
տաղերգու Սաշատուր Կեչառեցին ողբում է նրա մահը իր «Ողբ վասն
աւերման տանս Արեւելեան» ստեղծագործութիւնում¹³⁸: Ինչպէս երեւում
է, Խուժլու Բուղան, իր բոլոր նախնիների նման, առանձնակի կապուա-
ծութիւն է ունեցել Հաղբատի հետ, որտեղ եւ գտնւում է նրա որմնանկա-
րային պատկերը¹³⁹: Կարելի է չկասկածել, որ Խուժլու Բուղան փոխարա-
բերութիւններ է ունեցել նաեւ քաղկեդոնական հաստատութիւնների
հետ: Մասնաւորապէս, յայտնի է, որ նրա յիշատակին «ազապ» է սահման-
ւած Երուսաղէմի Սուրբ Խաչ վանքում¹⁴⁰:

Խուժլու Բուղան կնքեց իր մահկանացուն առանց ժառանգ թողնե-
լու:

12. Մանկասար, որդի Սաղուն Բ-ի (ծնուել է, հաւանաբար, ԺԳ-
դարի կէսերին—60ական թուականներին—մահացել է 1293 թուականից
յետոյ): Լինելով հզօր գերդաստանի ներկայացուցիչ, Մանկասարն ազդե-
ցիկ դիրք ունէր: Բաւական է ասել, որ նա ամուսնացած էր Դաւիթ Լ-ի

քրոջ հետ¹⁴¹։ Քանի որ 1295 թուականին վրաց թագաւորը քրոջն ամուսնացրեց մոնղոլ նոյիներին թուրքալի հետ¹⁴² , այն տպաւորութիւնն է ստեղծուում, որ Մանկասարը մինչ այդ արդէն մահացել էր։

13–14. ? , ? , որդիներ Սաղուն Բ.ի (ծնուել են, հաւանաբար, ժԳ. դարի երրորդ քառորդում—մահացել են ժԳ. դարի վերջում կամ ժԴ. դարի սկզբում)։ Նրանց մասին տեղեկանում ենք այժմեան Քարթլիս ցխովրեբալի մէջ չպահպանուած մի սկզբնաղբիւրից, որից ժամանակին օգտուել է ԺԷ. դարի հայագրի հեղինակ Փարսաղան Գորգիջանիձէն։ Եղբայրները գործում էին նաեւ Խուսթլու Բուղայի մահապատից յետոյ¹⁴³։

15. Վանենի, դուստր Սաղունի (ծնուել է, հաւանաբար, ժԳ. դարի 50–60ական թուականներին—մահացել է 1285 թուականից յետոյ)։ Փոքրութիւ հայերէն ու վրացերէն արձանագրութիւնները բաւականաչափ պատկերացում են տալիս իշխանուհու մշակութային—դաւանական դիմապատկերի մասին։ 1279 թուականին ամուսնու՝ Մխարգրձէլ Չաքարեանի հետ միասին կառուցել են Քորայրի քաղկեդոնականացուած վանքի զանգակատուն—տապանատունը¹⁴⁴։ Մօտաւորապէս նոյն ժամանակ ամուսինները հարկերից ազատել են միարնակ Սանահինի վանքը¹⁴⁵ , նուիրատուութիւններ են կատարել Հաղբատին¹⁴⁶։ Սանահինի արձանագրութիւնը, որտեղ ամուսինները նշում են իրենց «մահու չափ» տրտմելու մասին, քանի որ վանքը «հարկէ աւէրած էր եւ էկեղեցիքս փակած... յաւազ գատկին զվ[ար]դ[ապետն]երն ի քաչ ին արարել եւ այլ շատ նախատինք»՝ խօսուն վկայութիւն է նաեւ Վանենիի ազգային զգացումների մասին։

Հաւանաբար, ամուսնու հետ միասին թաղուել է Քորայրում¹⁴⁷։

16. ? , դուստր ?ի (ծնուել է ժԳ. դարի երկրորդ կէսում—մահացել է մինչեւ 1317 թուականը)։ Ըստ Օրբելեանի, նրա ազգական Լիպարիտ Բ.ի որդի Սմբատը «փեսայացեալ էր տանն աթարէկի Սաղունեանց»¹⁴⁸։ Պատմիչը չի յիշատակում իշխանուհու որոշակի ազգակցական կապը Սաղուն Բ.ի հետ, բայց նրա ամուսնու կեանքի տարեգրութիւնը յուշում է, որ Սաղունեան իշխանուհին Խուսթլու Բուղայի եղբայրներից որեւէ մէկի դուստրը կարող էր լինել։ Մահուան ժամանակը յայտնի է ամուսնու թողած արձանագրութիւնից¹⁴⁹։

17. Խուսթլու Բուղա Բ. (ծնուել է, հաւանաբար, ժԳ. դարի վերջում—ժԴ. դարի սկզբում—մահացել է 1367 թուականից յետոյ)։ Այս անձնաւորութեանը՝ «Զմանկասարենց Խուսթլու Բուղայն, զորդի եւ զթուռն իւր զամենայն, որ են խնամիք եւ բարեկամ», 1367 թուականին յիշատակում է Բջինի արքեպիսկոպոս Մանուէլ Ազիզբեկեանը¹⁵⁰։ Չափազանց հազուադէպ անունների (Մանկասար, Խուսթլու Բուղա) գուգակցութիւնը եւ խնամիական կապը Ազիզբեկեանների հետ՝ հիմք են տալիս ենթադրելու, որ

Մահկանաբերոցիները որոշակի դիրք էին պահպանում Հայաստանում նաև ԺԴ դարի կեսերին: Խուժուր Բուդա Բ.ն Մանկասարի որդին է կամ, որ աւելի հաւանական է թուում՝ թոռը:

ԽԱՒՌԱՍԵԱՆՆԵՐ

1. **Խաւռաս Ա.**, որդի Ամիր-Սարգսի (ծնուել է, հաւանաբար, ԺԲ դարի երրորդ քառորդում—մահացել է 1232 թուականից յետոյ): «Իշխանաց իշխան» Խաւռասը իր գրադեցրած դիրքի համար պարտական էր Ջաքարէ Բ.ին եւ Իւանէ Ա.ին, «յորոց առաջի սնեալ եւ զարդալ(րե)ալ, ի նոցին ողորմութեամբն մեծացեալ եւ փառաւորեալ»¹⁵³: Այսպիսով, նա Ջաքարեան եղբայրների կրտսեր ժամանակակիցն էր, եւ լիովին կապուել էր Շահնշահեան տան հետ Ջաքարէ Բ.ի մահից յետոյ: Եղել էր Ջաքարէ Բ.ի որդի Շահնշահ Ա.ի դաստիարակը եւ Շահնշահեան տան մտախորթութիւնացէսը¹⁵²: Ինչպէս երեւում է թոռան՝ Խաւռաս Բ.ի արձանագրութիւններից, զգալիորէն ընդարձակել է սեփական կայուածքները՝ Շահնշահ Ա.ից գնումներ կատարելով¹⁵³:

Խաւռաս Ա.ի առաջին կինը՝ «Խուժուր Խաթունն յազգէ գոլով պարսիկ, իսկ ի կոչմանէ եւ ի շնորհացն Աստուծոյ ճշմարիտ աղախին գոլով Քրիստոսի», վախճանուել է անդրանիկ որդու մահից (չուրջ 1229 թ.), տես ստորեւ) երկու տարի յետոյ, մտաւորապէս 1231 թուականին: Թաղուել է Բազնայրի տոհմական հանգստարանում: Նրանց յիշատակին էլ Խաւռաս Ա.ն Հոռոմոսի վանքում ընդօրինակել է տուել նշանաւոր Բազնայրի Աւետարանը¹⁵⁴:

Երկրորդ կինը՝ Չմրուխտ Խաթունը դարձեալ մահմետական էր, նշանաւոր տոհմից, եւ ամուսնանալուց յետոյ քրիստոնէութիւն էր ընդունել: Ամուսինները, բացի Բազնայրի Աւետարանից, հռչակաւոր Իգնատիոս զրչին պատուիրել են եւս մէկ Աւետարան, որի ծաղկման համար անհրաժեշտ ոսկին շնորհել է Չմրուխտ Խաթունը¹⁵⁵:

Հաղբատում, Ամիր-Քուրդ եւ Դաւիթ Մահկանաբերոցիների գերեզմանների կողքին, կայ եւս մի տապանաքար՝ «Խաւռաս» եւ նախորդին անմիջապէս կից՝ «Հասան» մակագրութիւններով¹⁵⁶: Եթէ այդ տապանաքարը պատկանում է Խաւռաս Ա.ին, ստացւում է, որ նա կրել է «Հասան» կրկնանունը եւ գերադասել է յուղարկաւորուել հին տոհմական հանգստարանում, քան ընտանեկան տապանատանը՝ Բազնայրում:

2. **Սասնա Ա.**, որդի Խաւռաս Ա.ի (ծնուել է, ամենայն հաւանականութեամբ, ԺԳ դարի սկզբում—մահացել է շուրջ 1229 թուականին): Նրա «կիսաւրեա» հասակում մահանալը արձանագրուած է Բազնայրի Աւետարանի յիշատակարանում եւ Բազնայրի վիմագրերից մէկում, որը թողել է մայրը¹⁵⁷: Բազնայրի վիմագիրը կազմուել է ՈՀԲ (1223) կամ ՈՀԸ

(1229) թուականին: Հաշուի առնելով այն հիւսկէն ժամանակագրութիւնը, որն ուրուագծուած է Բագնայրի Աւետարանի յիշատակարանի հիման վրայ (1229 թուականին վախճանուած է Սասնան, երկու տարի յետոյ՝ մայրը, յաջորդ տարուամբ նրանց յիշատակին ձեռագիր է ընդօրինակուած) գրեթէ անվերապահօրէն ընդունելի է թուում երկրորդ տարեթիւը¹⁵⁸:


Սասնայի կիսն էր Թայիկ «Թագոհի»ն, «որ է զարմ եւ շառաւեղ թագաւորացն Հայոց»¹⁵⁹: Դժուար է ասել, թէ կիւրիկեանների կամ Բաղաց արքայազունների հետ խնամիրական կապ ունեցող տոհմերից որի՞ց էր սերում Թայիկը:

3. Վասակ, որդի Խաւոաս Ա-ի (ծնուել է, հաւանաբար, ժ.Գ. դարի սկզբում—մահուան ժամանակը պարզ չէ): Թէեւ հայրը նրան «սիրելի որդի» է համարում 1232 թուականին¹⁶⁰, այնուամենայնիւ նա բոլորովին էլ Խաւոաս Ա-ի տիրոջիւնների միակ ժառանգորդը չի դարձել: Ինչպէս երեւում է Բագնայրի 1260ական թուականների արձանագրութիւններից, տոհմական կալուածքների զգալի մասն անցել էր Սասնայ Ա-ի որդի Խաւոաս Բ-ին¹⁶¹:


4. Խաւոաս Բ. (ծնուել է մինչեւ 1229 թուականը—մահացել է 1266 թուականից յետոյ): Յայտնի է յօգուտ Բագնայրի վանքին կատարած շուայլ նուիրատուութիւններով: Մասնաւորապէս, ուշագրաւ է այդ խոշոր վանական կենտրոնին 1266 թուականին «զգանձագին զՋրձորիկ վանքն իւր սահմանաւքն ջաղացովն եւ պահիզան» ընծայելու փաստը¹⁶²: Բագնայրին տրուած Աշնակ գիւղը Խաւոաս Բ-ն հարկադրուած է եղել վերստին գնել Շահնշահ Ա-ից: Հարցն այն է, որ թէեւ այդ գիւղը Խաւոաս Ա-ն «գնել էր» ու տուել թոռանը, այնուամենայնիւ պապի մահից յետոյ, ինչպէս երեւում է, պատրոնը ներկայացրել է իր իրաւունքները: Խաւոաս Բ-ն կրկին գնել էր Աշնակը՝ կնոջ «զբաժինքն ակն ու մարգարիտ»ն վճարելով¹⁶³:

Խաւոաս Բ-ի անդրանիկ որդի Սասնա Բ-ն մահացել է մանուկ հասակում, 1261—62 թուականին¹⁶⁴:

Խառնասեանների տոհմաձառը ըստ Բագնայրի Աւետարանի յիշատակարանների եւ Բագնայրի վիմակամ արձանագրութիւնների.



Մահկանաբերոցիների առաջ տոհմաճիղն առայժմ ներկայանում է հետևելալ տեսքով.



ԾԱՆՕԹԱԳՐՈՒԹԻՒՆՆԵՐ

1. Վազգեն Յակոբեան, «Գալիք-Քոբայրեցու Յիշատակարանը», «ՀՀ ԳԱԱ Տեղեկագիր (Խասարակական գիտություններ)», 1952, քի 8, էջ 120, ծ. 1: Աշոտ Յովհաննիսեան, *Դրուագներ հայ ազատագրական մղբի պայմանքան*, գիրք Ա, Երևան, 1957, էջ 213-214:
2. Cyrill Toumanoff, *Manuel de généalogie et de chronologie pour l'histoire de la caucasie chretienne* (Arménie-Géorgie-Albanie), Roma, 1976, p. 94-95.
3. B. Limper, *Die Mongolen und die christlichen volker des Kaukasus*, Köln, 1980, s. 227-231.
4. Հայր Միքայել վրդ. Չամչեանց, *Պատմություն Հայոց*, Կ. Գ., Վենետիկ, 1786, էջ. 257-258. Գարեգին Կաթողիկոս Յովսեփեան, *Խաղրակեանք կամ Պոռչեանք հայոց պայմանքան մէջ*, Անթիլիաս, 1969, էջ 11, 50 եւ յոգ.: Ուշագրաս է. որ գիտնականը Ամիր Բրդին եւ Մադուն Բ.ին կոչում է նաեւ «Մահկանաբերոյի իշխաններ», որը «Մահկանաբերոցի» անուանման ընդարձակ տարբերակն է: Տոհմի անդամներին մեծ մասամբ Արծրունի է անուանում նաեւ Աշոտ Յովհաննիսեանը (Յովհաննիսեան, էջ 52, 167, 213-215 եւ յոգ.):
5. Շ. Մեսիսիա, *Ներքաղարական կագութիւնը եւ պաշտօնական կառուցումներ XII դարի Արաստանում*, Թբիլիսի, 1979, էջ 277. Ի. Անթիլաս, *Արաստանի կենդրոնական եւ արեղական կառավարումը XI-XIII դարերում*, Թբիլիսի, 1983, էջ 219-226 (վրացերէն):
6. *Քարքիս գիտվերքա*, Կ. 2, Թբիլիսի, 1959, էջ 237, 248, 257, 269 (վրացերէն): Յետագայ

- էջերում վրացի պատմիչը Մադուն Բ.ին յիշատակում է սոսկ անունով կամ էլ «Մադուն արարել» ձեռով:
7. Մտեփանոս Օրբելեան Արք. Միմեաց, *Պատմութիւնն Նստանգին Միասկան*, Թիֆլիս, 1910, էջ 337, 355, 384, 426:
 8. Կարօ Ղաֆաղարեան, *Յովհաննավանքը եւ նրա արչանագրութիւնները*, Երեւան, 1948, էջ 83. նոյնի՝ *Սանահնի վանքը եւ նրա արչանագրութիւնները*, Երեւան, 1957, էջ 127, 141:
 9. *Գիւան հայ վիմագրութեան*, III, Երեւան, 1967, էջ 56, 80. *ԺԳ. դարի հայերէն շնուագրերի յիշատակարաններ*, կազմեց Լ. Խաչիկեան, Երեւան, 1950, էջ 374–375:
 10. Օրբելեան, էջ 426:
 11. Ի դէպ, որոշ դէպքերում նոյն իրավիճակն է տիրել նաեւ միջնադարում. միեւնոյն ստիւնը մերթ իր անուանումը ստացել է հիմնադրի կամ որեւէ նշանատր ներկայացուցչի անունից, մերթ էլ հիմնական կամ սկզբնական տիրոյթի: Օրբելեանը, օրինակ, Միմիքի մի մասի ազատագրմանը մասնակցած Ախթամարին կոչում է «Առփայեցի» ելնելով նրա Արփա գիւղի տէրը լինելու փաստից, իսկ քիչ անց, «Ախթամարեան գարնը» է անուանում տոհմի յաջորդ սերունդներին (Օրբելեան, էջ 350, 368, 491):
 12. Գրիգոր վարդ. Ալմերցի, *Պատմութիւն Թարսարաց*, Երուսաղէմ, 1974, էջ 42, 48:
 13. Մխիթար Այրիվանեցի, *Պատմութիւն Հայոց*, Մոսկուա, 1860, էջ 68:
 14. Մուրէն Երեմեան, *Ամիրսպասալար Զարարիա Երկայնարագուկ*, Երեւան, 1944, էջ 11: Այս տեսակէտն ընդունել են նաեւ վրացի հետազոտողները (Մեսխիա, էջ 277. *Անթելաա*, էջ 223):
 15. *Սանահնի վանքը*, էջ 125:
 16. Կիրակոս Գանձակեցի, *Պատմութիւն Հայոց*, աշխատասիրութեամբ Կ. Մելիք-Օհանջանեանի, Երեւան, 1961, էջ 386:
 17. Մովսէս Խորենացի, *Պատմութիւն Հայոց*, քննական քննազիրը եւ ներածութիւնը Մ. Արեղեանի եւ Ս. Յարութիւնեանի, աշխարհարար թարգմանութիւնը եւ մեկնաբանութիւնները Ստ. Մալխասեանի, լրացումները Ա. Մարգսեանի, Երեւան, 1981, էջ 85, 125:
 18. Ի. Չառսիսիշվիլի, *Վրաց ազգի պատմութիւն*, հ. 3, Թբիլիսի, 1966, էջ 367 (վրացերէն):
 19. Հրայեա Աճառեան, *Հայոց անչնանունների բառարան*, հ. Ե, Երեւան, 1962, էջ 223–226:
 20. *Հայերէն շնուագրերի յիշատակարաններ*, *ԺԳ. դար*, կազմեց Ա. Մաթեոսեան, Երեւան, 1984, էջ 178:
 21. *Նոյն*, էջ 179:
 22. Հայր Ղեռնդ Վ. Ալիշան, *Հայասպարում*, հ. Բ., Վենետիկ, 1901, էջ 389:
 23. *Քարքիս ցիտվերբա*, հ. 1, Թբիլիսի, 1955, էջ 344 (վրացերէն). Սամուէլ Քահանայ Անեցի, *Հասարմունքի գրոց պատմագրաց*, Վաղարշապատ, 1893, էջ 125. Վարդան Արեւելցի, *Պատմութիւն Կիւղերական*, Մոսկուա, 1861, էջ 156:
 24. Հայրապետ Մարգարեան, *Հիւսիսային Հայաստանի եւ Վրաստանի ԺԲ. դարի պատմութեան մի քանի հարցեր*, Երեւան, 1980, էջ 54–55, 90–92:
 25. Մուրէն Երեմեան, "Юрэн БоролЮбскун В Армянских У Грузинских Усточниках" (Եւորի Բողոլիութսկին հայկական եւ վրացական աղբիւրներում), *Գիտական աշխատութիւններ Երեւանի պետական համալսարանի*, հ. XXIII, Երեւան, 1946, էջ 399 (ռուսերէն):
 26. Անթելաա, էջ 223–224:
 27. *Գիւան հայ վիմագրութեան*, VI, Երեւան, 1977, էջ 199:
 28. *Գիւան*, VI, էջ 5, 108–110, 132–135:

29. Հ. Եղիազարեան, «Աշտարակ», *Էջմիածին*, 1966, Թ.-Ժ., էջ 96-97:
30. *Գիւան*, VI, էջ 204:
31. Եղիազարեան, «Աշտարակ», *Էջմիածին*, 1966, Ը., էջ 58-59. Սուրեն Աւագեան, *Վիսակաւ արչանագրութիւնների բառարանութիւն*, Երեւան, 1978, էջ 42-43, 336:
32. Ռ. Կիկնաձէ, *Վրաստանի պատմութեան աղբիւրագիտութեան հարցեր*, հ. 1, Թբիլիսի, 1984, էջ 171-173 (վրացերէն):
33. *Գիւան*, VI, էջ 139:
34. *Նոյն*, էջ 64-65. Գանձակեցի, էջ 215:
35. *Նոյն*, էջ 158-159. Գանձակեցի, էջ 215-216:
36. Գ. Սարգսեան, «Շխմուրատի վանքը», *Էջմիածին*, 1956, Գ., էջ 20-28:
37. *Գիւան*, VI, էջ 134: Հանապատասխան արձանագրութիւնները հրատարակուած են միեւնոյն հատորում:
38. Կարօ Ղաֆադարեան, *Հաղբապ*, Երեւան, 1963, էջ 188-189:
39. *Նոյն*, էջ 152:
40. *Յիշատակարաններ, ԺԳ. դար*, էջ 178-179. Հ. Ղեւոնդ Վ. Ալիշան, *Շիրակ*, Վենետիկ, 1881, էջ 116:
41. *Քարբիլիս ցիտվերբա*, հ. 2, էջ 272. *Վրաց ժամանակագրութիւն (1217-1318)*, քարգմանութիւնը Պարոյր Մուրադեանի, Երեւան, 1971, էջ 142:
42. Ե. Մետրեւելի, *Նիւրքեր Երուսաղէմի վրաց գաղութի պատմութեան վերաբերեալ*, Թբիլիսի, 1962, էջ 103 (վրացերէն):
43. Պարոյր Մուրադեան, *Հայաստանի վրացերէն արչանագրութիւնները*, Երեւան, 1977, էջ 182-184:
44. *Հայասպարում*, հ. Բ., էջ 350-351:
45. *Նոյն*, էջ 390. Գանձակեցի, էջ 208:
46. Մատթէոս Ուտիայեցի, *Ժամանակագրութիւն*, Վաղարշապատ, 1898, էջ 425. հմմտ. Մարգարեան, էջ 145-147:
47. *Հայասպարում*, հ. Բ., էջ 351:
48. Նոյն տեղում:
49. *Հայերէն չեռագրերի յիշատակարաններ, Ե.-ԺԲ. դդ.*, աշխատասիրութեամբ Ա. Մաթեոսեանի, Երեւան, 1988, էջ 224:
50. Ը. Մեսիսիս, «Թամարի առաջին պատմիչի մի տեղեկութեան ընկալման շուրջ», *Վրացական աղբիւրագիտութիւն*, հ. 3, Թբիլիսի, 1971, էջ 130-147 (վրացերէն):
51. *Սանահնի վանքը*, էջ 104:
52. *Գիւան*, VI, էջ 139:
53. *Նոյն*, էջ 37:
54. *Հաղբապ*, էջ 188:
55. *Յիշատակարաններ, ԺԳ. դար*, էջ 178:
56. Գանձակեցի, էջ 210:
57. Նոյն տեղում:
58. *Յիշատակարաններ, ԺԳ. դար*, էջ 178:
59. *Գիւան հայ վիճագրութեան*, I, Երեւան, 1966, էջ 57:
60. Նկատի ունենալով բնութագրական անունը՝ հետազօտողները յաճախ Մահկանաբերոցի են համարում նաեւ ԺԲ, դարի 60ական թուականներին Գեորգի Գ. ի կողմից Անիի քաղաքապետ նշանակուած Սաղոմիին (*Շիրակ*, էջ 100. *Խաղբակեանք*, էջ 2. Բ. Առաքելեան, *Քաղաքները եւ արհեստները Հայաստանում IX-XIII դդ.*, հ. 2, Երեւան, 1964, էջ 166): Այս վարկածը, սակայն, կարող է նաեւ առարկութիւն յարուցել, դժուար է ենթադրել, որ 1160 թուականին հարեւան մահմեդական ամիրայութիւնների բանակը դէպի Վրաստան առաջնորդած Վասակ Մահկանաբերոցու ազգականին

- մէկ-երկու տարի անց հնարատր էր այդքան կարեւոր պաշտօն վստահել: Բացի այդ, դժուար է պատկերացնել, Սաղուն քաղաքապետի տեղը Մահկանաբերոյցիների տոհմածառում: Ուստի Սաղունների շարքը նրանով սկսելը եւ Մահկանաբերոյցիների թուին նրան դասելը (տես՝ Յարութիւն Քիրտեան, «Իրլանտայի Տըպլինի Մատենադարանին Հայերէն Չեռագիրները», *Սիռն*, 1972, էջ 166. Toumanoff, էջ 94-95) վաղաժամ է թում:
61. Սարգսեան, էջ 26: Արձանագրութիւնը գրուած է «Յամի:Կ:երրոյցի:Ե:ե[ր]րոյցի նորս շրջագախ»: Այսինքն՝ հայոց փոքր թուականի 65րդ տարում: Բացառիկ հազուադէպ իրողութիւնն այն է, որ հայոց փոքր թուականի սկիզբ է դիտուած 1116 թուականը, հետեւաբար վիճագիրը թուագրում է 1181 թուականով (*Դիւան*, VI, էջ 159):
62. *Դիւան*, VI, էջ 158-159:
63. Գանձակեցի, էջ 215:
64. *Յիշատակարաններ*, ԺԳ, դար, էջ 183: Չեռագիրն այժմ պահուում է Դուրլինում: Յ. Քիրտեանը կարծում է, որ Աւետարանը ընդօրինակուել է ԺԲ, դարի 90ական թուականներին Նոր Գետիկի Նորաշէն վանքի համար (Քիրտեան, էջ 165-169):
65. Գանձակեցի, էջ 215:
66. *Յուզակ չեռագրաց Նոր-Չուղայի Ս. Ամենաիրկչեան վանաց քանդարանի*, Կ. Ք., կազմեց Լ. Սինասեան, Վիեննա, 1972, էջ 183:
67. *Հաղթար*, էջ 188:
68. Գանձակեցի, էջ 215-216:
69. Նոյն տեղում. *Դիւան*, VI, էջ 65:
70. *Դիւան հայ վիճագրութեան*, V, Երեւան, 1982, էջ 198-199:
71. Գանձակեցի, էջ 209, 386:
72. Նոյն, էջ 386:
73. *Քարրլիս ցիտլրերա*, Կ. 2, էջ 237. *Վրաց ժամանակագրութիւն*, էջ 110:
74. Ռաշիդ աղ-Դին, *Հաւարումն փարեգրութեանց*, Կ. 2, Մոսկուա-Լենինկրատ, 1960, էջ 60 (ռուսերէն):
75. *Քարրլիս ցիտլրերա*, Կ. 2, էջ 237. *Վրաց ժամանակագրութիւն*, էջ 110:
76. *Դիւան հայ վիճագրութեան*, IV, Երեւան, 1973, էջ 13: Սովորաբար կարծում են, որ գրիչը բաց է թողել թուագրման (Չէ) տասնատրը (նոյն տեղում. Աւագեան, էջ 279), բայց Սաղունի յիշատակութիւնը Խոշաբից յետոյ մտածել է տալիս, որ արձանագրութեան տարեթուի վերանայումը կարող է եւ պարտադիր չլինել:
77. Ռաշիդ աղ-Դին, *Հաւարումն փարեգրութեանց*, Կ. 3, Մոսկուա-Լենինկրատ, 1946, էջ 49-50 (ռուսերէն):
78. Գանձակեցի, էջ 386: Ըստ պատմիչի, մոնղոլների եւ սասունցիների միջեւ ձեռք բերւած պայմանաւորութիւնը յետագայում խախտուել է, հետեւաբար Սաղունը երկար չի կառավարել Սասունում:
79. *Քարրլիս ցիտլրերա*, Կ. 2, էջ 248. *Վրաց ժամանակագրութիւն*, էջ 119-120:
80. Ռաշիդ աղ-Դին, Կ. 3, էջ 67:
81. Գ. Կացիտաձէ, «Մի քանի տեղեկութիւն «Չամի աթ-թաարիխ»ից Սաղուն Մահկանաբերոյցու մասին», *Վրաստանի պատմութեան արեւելեան ճիւղեր*, Կ. 2, Թբիլիսի, 1979, էջ 67-74 (վրացերէն):
82. *Քարրլիս ցիտլրերա*, Կ. 2, էջ 248. *Վրաց ժամանակագրութիւն*, էջ 119-120:
83. Մայիս Աղայրեզեան, *Խաչատուր Կեչառեցի*, Երեւան, 1958, էջ 131:
84. *Յիշատակարաններ*, ԺԳ, դար, էջ 366. Գարեգին վարդապետ [Յովսէփեանց], «Չագաւանից ժողովրդ», *Շողակար*, գիրք առաջին, Վաղարշապատ, 1913, էջ 41:
85. *Քարրլիս ցիտլրերա*, Կ. 2, էջ 257. *Վրաց ժամանակագրութիւն*, էջ 129:
86. Կիկնաձէ, էջ 188:

87. *Քարթլիս ցխովրերս*, հ. 2, էջ 238–239, 244–248. *Վրաց ժամանակագրություն*, էջ 111, 116–120:
88. *Գիան*, VI, էջ 71:
89. *Քարթլիս ցխովրերս*, հ. 2, էջ 257. *Վրաց ժամանակագրություն*, էջ 129:
90. Կիկնածե, էջ 171–173: Մաղունը սեփականեց Դմանիսը՝ յարթելով վտանգատը մրցակցին՝ Յազանի որդի Խանե Արուլթիսաճէին (տես Պ. Մուրադեան, էջ 235–236):
91. Կիկնածե, էջ 171–173:
92. *Գիան*, VI, էջ 165, 213:
93. *Խաղրակեանք...*, էջ 303, 334:
95. Եղիազարեան, «Աշտարակ», *Էջմիածին*, 1966 թ.–Ժ., էջ 96–97:
96. Գ. Յովսէփեան, *Նիւթեր եւ ուսումնասիրութիւններ հայ արուեստի պատմութեան*, հ. Ա, Երեւան, 1983, էջ 229–230:
97. *Գիան*, VI, էջ 209, 210. *Հաղրասր*, էջ 193. *Յիշարակարաններ, ԺԳ, դար*, էջ 496:
98. Մաղունի մահուան տարրեր տարեթուերից, որոնք հանդիպում են հայկական սկզբնաղբիւրներում, առաւել արժանահատող Օրբելեանին վերագրուող ժամանակագրութեան 1282 թուականն է (*Մանր ժամանակագրութիւններ*, հ. 1, կազմեց՝ Վ. Յակոբեան, Երեւան, 1951, էջ 45): Վերջերս Կիկնածէն ցոյց տուեց, որ այդ թուականին է դնում Մաղունի մահը նաեւ *Վրաց ժամանակագրութիւնը* (Կիկնածե, էջ 178):
99. Գրիգոր վոյ, Ալմերցի, էջ 43, 48. *Հաղրասր*, էջ 193, 197:
100. *Գիան*, VI, էջ 205:
101. *Խաղրակեանք*, էջ 303:
102. Չագատանից ժողովը, էջ 26–27, 41:
103. *Քարթլիս ցխովրերս*, հ. 2, էջ 272. *Վրաց ժամանակագրություն*, էջ 142:
104. *Նոյն*, էջ 273. *Վրաց ժամանակագրություն*, էջ 142:
105. *Նոյն*, էջ 278. *Վրաց ժամանակագրություն*, էջ 147. հմմտ. *Մանր ժամանակագրութիւններ*, հ. 1, էջ 45:
106. Օրինակ, Ի. Չառախիշվիլի, էջ 366–369. Յովհաննիսեան, էջ 213–214:
107. *Հաղրասր*, էջ 188:
108. «Աշտարակ», *Էջմիածին*, 1966 թ.–Ժ., էջ 97:
109. Կիկնածե, էջ 188:
110. *Քարթլիս ցխովրերս*, հ. 2, էջ 281. *Վրաց ժամանակագրություն*, էջ 150:
111. Կիկնածե, էջ 184:
112. Ռաշիդ աղ–Գին, հ. 3, էջ 103:
113. *Քարթլիս ցխովրերս*, հ. 2, էջ 282: Բնագիրը վերականգնել եւ հայերենի է թարգմանել Պ. Մուրադեանը, տես *Վրաց ժամանակագրություն*, էջ 150:
114. Պ. Մուրադեան, էջ 228–235:
115. *Քարթլիս ցխովրերս*, հ. 2, էջ 284. *Վրաց ժամանակագրություն*, էջ 152, Կիկնածե, էջ 184, հմմտ. Ռաշիդ աղ–Գին, հ. 3, էջ 104:
116. Կիկնածե, էջ 184:
117. Նոյն տեղում:
118. Ամեցի, էջ 164: Ժամանակագիրն այս իրադարձութիւնը դնում է 1302 թուականին, մինչդեռ Դեմետրե Բ.ն գրաւած պետք է լինէր Խութլու Բուդայի հայրական կալուածքները մինչեւ 1284 թուականը:
119. Օրբելեան, էջ 426:
120. Ռաշիդ աղ–Գին հ. 3, էջ 114–116:
121. Կարօ Դաֆադարեան, *Երևան*, 1975, էջ 195:
122. Օրբելեան, էջ 426:

123. Ի տարբերություն նախորդ մի շարք հետազոտողների, որոնց կարծիքով Մաղունի մահից յետոյ նրա փոխարեն արարել է նշանակուել Տարսայիճ Օրբելեանը, Կիկնաճէն ենթադրում է, որ Տարսայիճը դարձել է ոչ թէ Վրաց թագաւորութեան, այլ միայն Հայաստանի արարել, այն էլ աւելի ուշ, Մահիր Գիւանի մահուանից յետոյ (Կիկնաճէ, էջ 178–180): Մակայն Տարսայիճ Օրբելեանի իրաւասութիւնների շրջանակը նշելիս պատմիչը ոչ միայն նշում է իր հօր Հայաստանի արարել լինելը, այլև ընդգծում է, թէ Դենետրէ Բ.ն. «եղ արարել (Տարսայիճին – Հ. Մ.)ի վերայ ամենայն տէրութեան իւրոյ մինչև ի Տիղիս եւ յԱնի եւ ի Կարս: Եւ եղ ի ձեռս նորա գտղայսն իւր՝ զԿատիր եւ զՄանուէլն, սնուցանել զնոսա եւ պահել» (Օրբելեան, էջ 426): Աւելի հաւանական է թում, որ Դենետրէ Բ.ն. քուլացնելու համար արարելութեան նշանակութիւնը, փաստօրէն բաժանել է գործակալութիւնը երկու մասի:
124. *Խաղրակեանք*, էջ 303:
125. Կիկնաճէ, էջ 186:
126. Նոյն տեղում:
127. *Քարրլիս ցիտլրերա*, հ. 2, էջ 291. *Վրաց ժամանակագրութիւն*, էջ 158. Ռաշիդ աղ–Գին, հ. 3, էջ 121:
128. *Քարրլիս ցիտլրերա*, հ. 2, էջ 289–290, 292–293. *Վրաց ժամանակագրութիւն*, էջ 157, 159–160. Անեցի, էջ 164 (տարեթիւը խիստ աղսաաղուած է):
129. *Քարրլիս ցիտլրերա*, հ. 2, էջ 294. *Վրաց ժամանակագրութիւն*, էջ 161:
130. Ռաշիդ աղ–Գին, հ. 3, էջ 127:
131. *Քարրլիս ցիտլրերա*, հ. 2, էջ 297. *Մանր ժամանակագրութիւններ*, հ. 1, էջ 149:
133. *Քարրլիս ցիտլրերա*, հ. 2, էջ 296. *Վրաց ժամանակագրութիւն*, էջ 162. Կիկնաճէ, էջ 190–191:
134. Յովհաննիսեան, էջ 254–255. հմմտ. Լեւոն Բարսեյեան, *Հայաստանի սոցիալ–տնտեսական եւ քաղաքական պատմութիւնը XIII–XIV դարերում*, Երեւան, 1964, էջ 332. Հ. Ստեփանեան, *Հայ ժողովրդի պայքարը քարաք–մոնղոլական լծի դէմ*, Երեւան, 1990, էջ 102–103:
135. Կիկնաճէ, էջ 194–196:
136. Ռաշիդ աղ–Գին, հ. 3, էջ 134:
137. *Գիւան*, VI, էջ 204–205:
138. Աղալրեզեան, էջ 129–133:
139. *Հաղրսպ*, էջ 152:
140. Մետրեւելի, էջ 103:
141. Կիկնաճէ, էջ 197:
142. Նոյն, էջ 196–197:
143. Նոյն տեղում: Մ. Ասազեանի կարծիքով, Մաղուն Բ.ի որդիներից է նաև Պապացը, որը յիշատակում է Խնձորիտի «Բեն» խաչքարի արձանագրութիւնում (*Գիւան*, VI, էջ 219–221): Վիմագիրը, սակայն, այնքան է եղծուած (չի ընթերցում «Մաղուն» անունը, «Պապաց» անձնանունը յաջորդող տառաշարքը քայքայուած է), որ դժուար է միայն նրա հիմանք եզրայանգում կատարել:
144. Մուրադեան, էջ 177:
145. *Սանահնի վանքը*, էջ 125:
146. *Հաղրսպ*, էջ 171:
147. Մուրադեան, էջ 182:
148. Օրբելեան, էջ 432:
149. *Գիւան*, III, էջ 55: Ալիշանը (*Սիւսիւան*, Վենետիկ, 1893, էջ 114) եւ Գրիգոր Գրիգորեանը (*Սիւնիքը Օրբելեանների օրօք, XIII–XV դարեր*, Երեւան, 1981, էջ 108–109) Մահկանաբերոյցի իշխանուիուն համարում են Մաղուն Բ.ի դուստր եւ նշում են

անունը «Ոխթոզ»։ Այս տեսակետը հիմնուած է իշխանուհու անուննու վերոյիշեալ արձանագրութեան ափշանեան հրատարակութեան վրայ (*Միասկան*, էջ 114–115), բայց անգամ այստեղ անձնանունը բերուած է որպէս ենթադրական ընթերցում։ Արձանագրութիւնը խիստ հողմահարուած է, ուստի Մեղրակ Բարխուդարեանը հրաժարուել է անձնական վերձանման փորձից, իսկ Աճառեանը խուսափել է «Ոխթոզ» անձնանունը ստուգաբանելուց՝ նշելով մէկ անգամ, այն էլ անստոյգ ընթերցմամբ վկայուած լինելու խանգարիչ պարագաները (տես՝ Հ. Աճառեան, *Հայոց անչնանունների քառարան*, հ. Գ. Երեւան, 1943, էջ 185)։

150. *Խաղրակիւանք*, նոր յանելուած, Ա., էջ 426։

151. *Յիշատակարաններ*, ԺԳ. դար, էջ 178։

152. *Նոյն*, էջ 178–179։

153. *Շիրակ*, էջ 116։

154. *Յիշատակարաններ*, ԺԳ. դար, էջ 179։

155. *Նոյն*, էջ 179–180։

156. *Հաղրապ*, էջ 188։

157. *Յիշատակարաններ*, ԺԳ. դար, էջ 179, *Շիրակ*, էջ 116։

158. 1229 թուականին գերադասութիւն են տալիս նաեւ Գարեգին Յովսէփեանը (*Նիւթեր եւ ոստմնասիրութիւններ*, հ. Ա., էջ 237) եւ Հրայ Բարթիկեանը (Հ. Բարթիկեան, «Բիզանդական Ղարաա արիստոկրատական ընտանիքի մասին», *Պագմա-բանասիրական հանդէս*, 1988, թիւ 1, էջ 172 (ոտսերէն))։

159. *Յիշատակարաններ*, ԺԳ. դար, էջ 179։

160. *Նոյն* տեղում։

161. *Շիրակ*, էջ 116։

162. *Նոյն* տեղում։

163. *Նոյն* տեղում։

164. *Նոյն* տեղում։

THE PRINCELY FAMILY OF THE MAHKANABERTSIS
(SADUNIANS) IN THE 12th-13th CENTURIES

(Summary)

HAYRAPET MARGARIAN

The author divides his research regarding the Mahkanabertsis into five sections: a) Name and origin of the family; b) The nature and scope of their activity; c) Their feuds and connections; d) Their sectarian inclination and ethnocultural image; e) Genealogy.

According to the author, the Mahkanabertsis family has a respected place among those who represent the leading feudal families of the 12th-13th centuries Armenia. During its peak in power the members of this family influenced not only Armenia, but played a significant role in the fate of Eastern Georgia, particularly during the decades between 1270 and 1290.

Unlike the other Armenian feudal families of the time, the Mahkanabertsis had singularly strong connections with diverse cultural, sectarian and ethnic factions. Oftentimes they were more active abroad than in Armenia proper.

After thorough and detailed discussions, the author concludes that the family's origins are deeply rooted in a high ranking Armenian family; the family had 2 periods of ascendance: first from 1150-1180, when a member of the family became mayor of Tbilisi (and consequently a predecessor of the Zakarian noble Armenian family); second, during 1270-1290, when the family became allied with the Mongols. Their feudal holdings and properties were mainly located in northern Armenia; some of them were Armenian Orthodox, others had become Chalcedonic with strong links with the monasteries of Haghpat, Sanahin and Kobayr; they had familial ties with Armenian, Georgian, Iranian, Moslem and Turkish high-ranking families.